





1771
Arca pitca.

J. M.
Fe. Fe. M.
A. VI. 25 (a-b)

R

F



R
fe

co

gu

co

R

ru

ru

lia

me

8

R



I

PANEGYRICVS

LVDOVICO XIII.

DICTVS.



Trigisti gloriæ verti-
cem, REX INVI-
CTISSIME, adepta
es votorū summam,
fortunatissima Gal-
lia, tenes fastigium
dignitatis, Christiana

Religio. Bellum illud aliquando con-
fecimus, ad quod vnum, toto seculo
communia omnium vota, priuata sin-
gulorum studia, publica comitorum
consulta, sacrorum augusta solemniz,
Regum expeditiones innumeræ, multo-
rum, terra marique contentio pralio-
rum; belli, pacisque quotidiana consi-
lia, Reipublicæ demum totius rationes,
motus, sensus vniuersi referebantur:

*Exemplum Caroli. ne
in Ponty Regis
ad id. f. 1. 1. 1.*

ne quis possit ambigere, quin hoc vno cardine fortuna Ciuium, fors Galliar, maiestas Imperii niteretur. Habet superbia suos gradus, ad extremum deuoluitur, postquam peruenit ad primū; qui non nouit ultra crescere, ruere cœpit, nihilque tam propinquum est casui, quam quod est summum: cælum ipsum, quo nihil altius occurrit aspectui, fatum expectat, & momento sæpissimè perit, quòd ægrè seculum peperit. Sic illa iacent tot annis sudata perduellium propugnacula, dissipatæ sunt ingentes illæ Britannorum classes, vtrorumque iuncta cum extrema rerum desperatione incredibilis audacia corruit; terræ, maria, tempestates succubuerunt fortitudini Regiæ: locis demum vniuersis profligata Rebellio, simul omnia sibi sensit præter inferos esse conclusa. Quæ immensitas gloriæ, naturam totam vnius triumpho pompa traducere! vtque pauci homines parer

dice-

discerent, elementis omnibus imperare! Quod si adhuc aliquis ex illa furiosorum hominum turba, qui humanæ fidei desertores, sensim à diuina deficiunt, de æternitate huius imperii dubitauit; fateatur errorem suum hodie, postquam illud videt perduellionis ruinis impositum; felicique commutatione fatorum, à REGE LVDOVICO, immortalitatem regni, nominisq; Gallici confirmatam, ex quo hæreticus desertor occubuit. Cui enim cælum aut Iubentiùs laboret aut gloriosius, quam ei Principi qui Numinis hostes euertit? Quem alium coronet ambitu seculorum, & temporum, quam eum, à quo tot laureis coronatur? Delubris eos coluit Antiquitas, qui istis minora fecissent, & pro Diis habiti sunt apud suos, qui tecum, REX FORTISSIME, comparati vix homines viderentur. Quot tu ergo fana? si vixisses illis temporibus, neque te ad scelicitatem nostram

A 3

stram

stram fata seruassent, quas ædes? quo
 numine consecrasses? Quam Religio-
 nem populis attulisses? Non ciues, vt
 aliorum solebant, sic tuum funus ex-
 pectassent, tempus illud sacrificiis oc-
 cupassent; ipse uiuus habitasses in tem-
 plis, auxisses orbis cerimonias, & aris
 impositus, quibus auribus nostra nunc
 percipis, eisdem omnium vota gentiũ
 accepisses. Verum tu qui solidis abun-
 das laudibus, hac inani superstitione
 non indiges. Non crescit mendacio
 veritas; ad Superos, vita, non fama nos
 euehit, Tuis maior es incrementis, quàm
 fictæ religionis encomiis; mauius subli-
 mi demissione maiestatem tuam extol-
 lere, quam abiecta superbia, & sordi-
 do fastu deprimere. Cudes conscien-
 tiæ bonis, nullaque præterea re, quàm
 virtute, vis cæteris eminere mortali-
 bus; adeoque diuina cum facias, huma-
 nam sortem non erubescis. Faceat
 ergo vana hæc species religionis, ve-
 tat

Ludouico XIII.

Et ipsa Religio Regis laudes sacrilegio
prosequitur: quam sunt illa deformia, quæ
crimine strantur; virtus virtute
laudatur, nunquam consecratur à vi-
ticio. Votis publicis Oratores alii suo-
rum principum facta commendent, fa-
ciam ego vt intelligant vniuersi, te tuis
factis REX AVGVSTISSIME vota
mortalium superasse, & si vota vni-
uersorum, quanto magis mea vnus
præconia superasti? quidquid tamen de
te dixerimus, dictum erit magnificè,
quia nihil fecisti humiliter, & demissè;
toties amplissimè laudaberis, quoties
verè, quæ gesseris narrabuntur; rur-
susque toties vera de te audies prædi-
cari, quoties recitabuntur amplissima.
Ornasti tu tua facta, corrumpet qui
melius ornare voluerit. Mitto igitur
esse sollicitus de cultu orationis, post-
quam tantus est splendor in ipsa mate-
ria. Narrabo sine multo apparatu quos
hoc bello hostiū populos viceris; quam

rupem, quam Rupellam expugnaris; quas procellas, & maria fregeris. Sed adhuc necesse est scire, quod dicendi initium, quem modum facere debeat? non quod laudes tuas, quæ sunt immensæ, credam ullis terminis definiri posse: sed ne infinita fiat oratio, si in proferendis tuis trophæis, velim ire per singula. Sequar igitur in scribendo, ordinem agendi tuum, & cum magnitudinem hostis, quem oppressisti demonstrauero, tum pugnae genus exponam, seriemque victoriae.

Hostis erat vincendus ille, qui summo ingenio semper elatus, nunc certe longo virium suarum usu, & fortitudinis experimento, supra modum timidus, certior sibi semper de victoria, quam de prælio videbatur. Erat communis omnium sensus: Rupellam, temeritate & audacia tentari posse; nulla arte, aut machinis capi posse; quæ hinc arduis quidem propugnaculis, fossa præ-

sa præcipiti, pendenti vallo, continu-
 ato aggere, densa præude, molitione
 multiplici inclusa esset; illinc vero la-
 tuissimo, altissimoque freto munita, cui
 projectæ turres incumbere, & obli-
 cerentur portæ, tranuersis cratibus,
 horrenti ferro, armatis nauibus, ferali-
 bus tormentis, ineluctabili catena val-
 latæ: adeò multiplici carcere debuit,
 antequam moreretur, includi rebellio!
 quæ se virtute tueri non potuit, debu-
 it machinis, & quæsitâ munitione de-
 fendere. Quot dementia vallis indr-
 get? seipsam innocentia sine custode
tutatur; impietas nullo arcium muni-
mento secura est. Mediis soluta Ru-
 pella vivebat in vinculis; semper pau-
 da, quia semper rea: semper de præsi-
 dio sollicita, quia conscientia sceleris
 semper obfessa. Accedebat vis annonæ
 incredibilis, vini, frumentique nume-
 rus ingens, apparatus denique rerum
 omnium, toto seculo meditatus. Nimi-

rum omnia sibi necessaria timor putat. Præstò erat exercitus in Occitania, reliqui signo dato in castra venturi, palam, & publicè dicebantur. Subsidiòrũ præterea oportunitates innumeræ, robur Angliæ coniurata, præsidarius miles erat intra mœnia receptus, ut pugnarent exteri, ciues sine periculo triumpharent. Non obscura erant iurata sociorum auxilia, & cæterorum hæreticorum variis locis factiones; petebatur hæreseos caput, quisque manum obiecitabat. Procerum etiam quorundam, ut rumor tulit, enormes coniurationes celebrabantur, illius nefariæ societatis tabulæ, perduelliumque sicariorum adscripta funesto catalogo nomina circumferebantur, confæderatorum dignitas (si in prodicione patriæ aliqua dignitas esse potest) famam, nomenque sceleribus colligebat; quem detetreat atrocitas facti, facientis auctoritas inquitabat. immensas quasdam
habet

habet vires ad persuadendum nobilitas generis. Speciosa sunt crimina, quæ in purpura nutriuntur. Ad hæc infinitis bellorum sumptibus, Regis exhaustum erat ærarium, nobis tum classis nulla, quadriremes iam pridem dimissæ, caritas annonæ hoc tempore summa, frugum interitus, virgens fames, grassantes morbi, pestis locis omnibus multa: malos premebamus, malis obruti; obsidebamus paucos, omnes obsessi; vix licebat vivere, & vincere volebamus. Augebat infinitè superbiam hostium longa belli experientia: quippe qui non solum olim sæpè, modo cū Anglis, modo cum Batauis, partim cum Hispanis, partim cum Lusitanis conflissent: sed & nuper Regis classem tum oceani, tum mediterranei maris copiis instructissimam duobus præliis fortiter sustinissent: Quis in tanto apparatu Rupellæ sensus? Eo devenerat impudentissima Civitas, ut dudum

ceteris

cæteris gentibus cladis metum inferre, regum purpuram, leges, & oracula conculcare, Reipublicæ succum, & sanguinem exhaurire, cædes, & incendia circumiectis regionibus, & agris obicere; antiquas Drusiæ prælii, Dionysiæ, Iarnacensis, Moncontorique tragædias renouare facile posset. Tantum erat in impudentia roboris, tantum virtutis in scelere! Rupella reginam agebat imperare docta, quæ nunquam parere didicerat. Administra omnia, summæ auctoritate: cætus prouinciales indicebat, militem tunc domesticum, tunc externum conscribebat, prouincias, præfecturasque diuidebat, ius cudendæ monetæ sibi arrogabat, inurebat sigillo, ferebat edicta, imperabat pecunias, portoria exigebat, in omnia demum tyrannico dominatu inuadebat; vt incertum videri posset, plusne Regi per auctoritatẽ, an subdito per crimen, audaciamque liceret,

liceret. Horrebat immaniter Rupes ista, celsaq; fronte crescebat in dies, ut ponderosius rueret: periculis superbiam animabat, erigebatur denunciatio-
ne bellorum, vel ipsa sanguinis specie pascebatur; decernere videbatur illi triumphum, quicumq; prælium indice-
bat, maiorq; persuasione quam robo-
re, nunquam cessabat ab iniuria, ne
causæ bellorum interirent; scelus ale-
bat quotidie, ut vel crimine prælia na-
scerentur. Quis tandem hanc arro-
gantiam, hos spiritus frangeret? nescit
timere, quæ tanta sperat, nescit cade-
re, tot victoriis instituta. Vbi pericu-
lum, inquit, si noluero periclitari? ubi
hostis, si ipsa mihi non fuero inimi-
ca? didici vincendo quid possim. Sic
plena sui Rupella se impudenti ore ia-
ctabat.

Mouebat illud nos quidem, cum
nobiscum funus istud domesticum vi-
veret, panè tamen verebamus fateri
dolo-

dolorem nostrum, miseriq; maioris metu, vix licebat in communi miseria, vultum portare fortunæ. Sedebat enim in regni visceribus virus illud, quod sine miserabili pectoris totius laceratione non poterat euomi; quodq; nisi euomeretur, Respublica non poterat conseruari. Oppresserunt Pannonas Hunnii. Græcos Turcæ. Italos Ostrogothi, Hispanos Visigotti, Syrios, & Ægyptios Saraceni, sed illorum immanitas cum rebellium hæreticorum furore comparata, humanitas dici possit. Ferebamus iugum Franci, quæque cæterarum gentium seruis dat Gallia libertatem, ipsa seruitutem à subditis quodammodo tolerabat! adeò probrum illud imperii, nec ferri poterat, nec auferi! Quid? non desperat propterea Carolus IX. sed anno millesimo quingentesimo septuagesimo secundo, colligit eorum robur imperii, floremque nobilitatis, conscribit nu-

merosum exercitum, vim tormentorum maximam rotat, immensos sumptus facit, Ducem Andegauensem copiis præficit, qui illo bello Rex Poloniæ electus, felici sceptrorum, ordine venerandum Henricorum nomen, & seriem aucturus erat, & ab Sarmatico illo tyrociniio maior venturus ad Galliarum principatum. Is Rupellam aduolat, castra metatur, copias explicat, urbem vallat. Proh tempora, quam me labè refricare còégistis! Erat in armis pro rege, regis ipsius frater, Dux præstantissimus; arma Rex Nauarræ coniunxerat, Henricus ille, nondùm magnus, qui & ipse feliciter successit in regnũ. Aderant viri principes Condæus, Contynus, Duces Montispenserii, Gaysii, Aumalæ, Niuernenses, Longaulai, Bullionii, aliique toto regno proceres infiniti accurrerat ex mandato regio fortissimus ille Biro cum cohortibus octodecim, turmis equitum septem, m^o chais

chinis muralibus vndecim. Quid præ-
 terea? quinquaginta millibus armato-
 rum Rupellenses obsidentur, tormen-
 tis sexaginta, nulla intermissione mu-
 rum quatientibus, vrbs oppugnatur,
 parte alia suffocatur, alia quassatur:
 fit labes ingens, & à vetusto vrbs fon-
 te ad Euangelii propugnaculum, (quod
 vocant) moenia lacerantur, turris Co-
 gniensis à fundamentis euertitur, no-
 vies in Urbem irrumpitur, nouies, Ru-
 pella, collata in vnum omnium signa
 sustinet. Quid tandem? cecidit in irri-
 tum totus ille quam magnus fuerat ap-
 paratus, stetit Rupella nondum bene
 degustata, fusæ obsidentium copiarum mu-
 lti non pauci, trucidati innumeri,
 obrita prima acies, lacerata proxima,
 territa dissipataq; postrema, viri prin-
 cipes multi miserabiliter cæsi, missa è
 tormento pila Dux Aumalæ interfe-
 ctus, Dux ipse Andegauensis pœnè illa
 clade implicatus, nisi excussum in il-
 lum.

lum plumbum, fidelis Armiger, nomi-
 ne Vinsius, interiecto corpore recepif-
 set, ac demùm vndecim nullia nostro-
 rum, calamitosa strage deleta. O ru-
 pem hominibus inaccessam! O formi-
 dabilem hostem! O inexpugnabilem
 ciuitatem! qui pugnantium cumuli!
 sed qui cumuli sepulcorum! accesserunt
 innumeri, facile fuit numerare
 qui recesserunt. O rupes! O clades!
 O funera! illa tamen Rupella, rupes
 illa, ille victor populus, populus ille
 tot ferè palmarum, quot capitum, ti-
 bi, LVDOVICE, relinquitur debel-
 landus, Hic habes Cannas Annibal,
 hic Actium Auguste, hic Ciliciam
 Alexander, hic Carthaginem Scipio,
 hic Pharsaliam Cæsar. Accedant recen-
 tes omnes expugatores arcium, &
 ampullati rerum gestarum amplifica-
 tores, suas expeditiones conferant cum
 obsidione Rupellæ. Verrucam iactant
 vnum scilicet terræ iugerum. De quo
 quis

quis viso, dicere possit, ubi est? Ostendam suam ostentant, illudne receptaculum paucorum de naui hominum, & exilium piscatorum? Rhodum insulam memorant, sed interceptam, & Christianorum Principum auxilio destitutam: Juliodunum afferunt, sed vasto muro-
rum ambitu difficile ad tuendum: Melitam prædicant, sed belli casibus superiorem: Viennam loquuntur, sed inexpugnabilem Solimano: Metas celebrant; verè metas, quas antiquo opere malè munitas, Carolus tamè Quintus, centum armatorum millibus, fretus, non potuit transgredi. Nos Rupellam dicimus expugnatam à LVDO-
VICO, cæteris omnibus insuperabilem: Rupellam, inquam, non vastam amplitudine, non desertam infrequentia, non prestam angustiis, non rudi defensam milite, sed in Regni finibus sitam, confæderatis gentibus finitimam, omnibus belli præfidiis opportu-
nam

Ludovico XIII.

runam, veteri quidem, sed multò magis recenti munitione formidandam: cuius portus non sit accersitus, fossa que quæsitus, vt Antuerpiæ: non incommodus, & difficilis, vt Iecius, non periculosus, vt Ostendæ; non vastus, vt Græciæ sinus: sed tum loci natura, tum arte omni firmatus, vt incertum esset, plus naturæ deberet, an arti; dum ars naturam superasse, naturam nullum arti locum reliquisse videretur. Tantus nimirum esse debuit, qui ad armâ Regem tantum adigeret, alteri enim sit iniuctus, necesse est, quemcumque LVDOVICVS oppugnat, qui ceterorum ducum desperationem in victoriani vertit, & per acervatos confectorum hostium cumulos, suorum currus agitât triumphorum.

Meruenda quidem erat difficultas cingendæ ciuitatis, procellosissima præsertim anni tempestate: timendus hostilis exercitus, qui aderat è regione
Rupel,

Rupellæ, Anglus ille, mari cedere ne-
 sciens, infinitis naualibus præliis victo-
 riisque superbus: moram fecisset alte-
 ri locus ipse, (qui stagnanti palude si-
 mul insalubris, atque subsidens, so-
 lus obsessuris erat relictus: occurrebat
 ingenium accolarum, quorum maxi-
 ma pars, ut erat hæresis labe corrupta,
 ob ipsam quoque viciniam poterat esse
 suspecta: commouebant omnes, priscae
 tum externorum, tum ciuium nostro-
 rum historia, qui tot tamq; numerosis
 exercitiis instructi, toties frustra cum
 Rupella contenderant: videbat Rex
 ipse rebellium horrea cumulari expi-
 latorum populorum com meatu, spolia
 prouinciarum in urbem quotidie com-
 portari, quodque grauius erat, non u-
 no prælio rem posse confici, sed locū,
 stagna, paludes, æstuaria, turbines, im-
 bres, procellas, terras, maria, despe-
 ratosque rebelles, esse ante superan-
 dos, quam Rupella potiretur. O diffi-
 cultates.

cultates immensas! o inextricabiles series præliorum, laboresque perpetuos! quem non ista moles rerum oppressisset, quæ Regis animum omnibus difficultatibus celsiorem erexit? An putatis hoc aspectu negotiorum, bellorumque nexibus esse commotum? audite quæ dixerit, dicturi seculis quæ audistis. Ibo, inquit, ibo maioribus meis maior, & nobile posteris argumentum. Tulit superior ætas, quod secutura non feret; pareant, aut pereant quos Deus nostro subiecit imperio; ad pedes cadat, qui mecum ad manus venerit, & infelix congressu, nobilitetur interitu. Hæc oracula lituis, & buccina commutavit, conclamatum est ad arma, contractus exercitus, Rex ipse nondum è graui morbo receptus, cum lectissima nobilitate fudit se Parisiis, militem rapuit, Rupellam aduolauit, tenuit, cinxit, perdidit. In quo quid primum nos mirari iubes, Imperator?

exor-

exordium belli, an exitum? celeritatē
 aduentus, an constantiam obsidionis?
 hostis audaciam, an fortitudinem tu-
 am? vtrumq; certē stupore dignissimū,
 nisi quò teneor promissi reus, & ne-
 cesse videtur seriem recitare totius
 belli, cuius difficultatem exposui: nos
 satis, superque hostis audiuit, te vide-
 at aliquando: gaudeat Rupella de ro-
 bore, dum te intuemur hoc altero o-
 rationis loco, de illius contumacia tri-
 umphantem.

Erat, vt diximus, concisus æstuari-
 is locus, in quo vno cāstra metari Rex
 poterat, paludes interectæ admodum
 insalubres, cælum crassum, solum lu-
 bricum, stagnum mutum. Proh superi,
 per quot bella, ad vnum bellum est
 ventum! Quoties certatum est, vt se-
 mel certare liceret! Stagna oppugna-
uimus primū, antequam procellas ex-
pugnaremus; hæsit in palude, nostræ
militiæ rudimentum, vt in Oceano vi-
 ctoria

Atria tota confisteret, Solum arrisit
 disciplinae, caelum affulsit victoriae, lo-
 cus ipse visus est dedisse locum virtu-
 ti. Castra montibus vallauerit Anni-
 bal. Tamerlanes in Urbis modum æ-
 dificarit, Attila militaribus pellibus
 obruerit, saracinis Græci, curribus Ger-
 mani, testudine Romani se texerint:
 tu, Rex inclyte, qui nolebas suffurari
 victoriam, in aperto campo sedisti: In
 hac, inquam, æquata planitie, noster ex-
 plicatus, exercitus, ut hostis implicaretur;
 Inferuntur signa, ne lateret aduersus, Vrbs
 ex itinere salutatur adeò expetebatur.
 Dum hæc geruntur, miles sortiri vul-
 tu perduellem, terrere gestu, spe ipsa
 diripere. Nutasti, credo, furiosa rebel-
 lio, cum te, foris LVDOVICI IVSTI-
 TIA, domi, conscientia sceleris obli-
 deret. Impalluisti, quæ ruborem amife-
 ras, nunquam alba magis (quippe te
 Urbem Albam prædicas) quam cum
 alba Imperii Lilia suspexisti. Sed quò
 à rege

à rege discessimus? immo verò quò
 Rex discessit à nobis? auolauit celeri-
 tate victoriæ. En iam toto Rupellæ
 ambitu se maiestas illa diffudit. Virtus
 nullis limitibus continetur, sed impa-
 tiens claustris, vltro se iactat, sui no-
 minis, & numinis explicatrix. Parum
 fuerat scilicet labore superasse loci na-
 turam, nisi artem victor noster inge-
 nio superaret. Toto igitur continentâ
 propugnacula iubet excitari, aggeres
 extrui, vallum duci, triumque leuca-
 rum circuitu, Rupellam fossis, iuxta,
 & interpositis staniunculis, ad com-
 municationem armorum circumscribi.
 Secuta est Ducis imperium celeritas
 operis inusitata, hic vallum ferre, ille
 cæmenta conuehere, lapidesque por-
 rare, palum alius defigere, alius hu-
 mum egerere, cespitem moliri rectum,
 fingere, inducere, cumulare, exagge-
 rare; sui quisque gradus obliuisci, di-
 gnitatem labore metiri, meritum ope-
 re,

re, maior ille prædicari qui actuosior,
 ille præfici qui plus aliquid perfecisset,
 pro se quisque demùm contendere ne
 illo laboris certamine vinceretur. Ad-
debas interim fatigatis alacritatem.
humanissime PRINCEPS, omnium onera
vultu portabas, laborem nutibus
subleuabas, opus laudibus compensa-
bas. Quid exulistis tantopere prisca
 monumenta Dionysium, quod sexaginta
 millia operarum exerceret, cum,
 incensibus aras Syraculanas ambiebat?
 quid Neronem historici, quod hume-
 ris corbem ferret, cum Isthmum Co-
 rynthiorum perfodiebat? quid Caracal-
 lam annales, quod semper laboris ini-
 tium faceret, cum in castris agebat?
 quid Manuelem Commenum, Græci,
 quod saxa veheret, cum Doryleum re-
 nouabat? quid Constantinum, Roma-
 ni, quod terram foderet, cum magni-
 ficentissimi templi fundamenta iacie-
 bat? **LVDOVICVM** habent Galli, qui

singulis militibus adlaborer, tantum
 ipse conficiens operis, qua itum impe-
 ret vniuersis: architectus in opere, mi-
 les in vallo, dux in agmine, vbiq̄ue
 Augustus. Sed, vt video, dedignaris
 hanc laudem, sapientissime REX. Tua
tantum esse putas, quæ tecum nullus
alius fecerit; maioris ferre virtutis, quam
laboris encomium, illa in te egregia,
hic tibi communis cum milite fuit.
 Pugnauerat Imperator ingeniosa com-
 positione castrorum, reliquum erat, vt
 disciplina, & ordine militiae triumpharet;
 scripsit ergo militibus suis eas le-
 ges, quæ, vt sibi scriberentur, contem-
 dere ipsi debuissent; docuitque prius
vincere morum integritate, quam fir-
mitate neruorum. Et quidem quisquis
in hæreticos pugnaturus est, debet vir-
tute, quam manu certare validius. O
 nouam bellorum faciem, nouumque
 genus oppugnationis! hætenus credi-
 tum erat, peruerso, & præpostero præ-
 liorum

liorum vsu, bellum sine caede, sine fa-
cinore, sine contumelia numinis geri
vix posse; sed ex quo nostrum militem
vidimus à cruore, à libidine, à conui-
cio tam alienum, eredi capit inter ipsa
arma, locum esse virtuti, scelusque
non stipendiarium esse belli, sed vo-
luntarium administrum arbitrii. Quid?
quod totum exercitum concolori ve-
ste donauit: vt qui corporis cultu si-
mites essent, solo animorum ornatu di-
stinguerentur; & quantum alii bom-
byce, & purpura nitere amant, tantum
ipsi virtute ceteris eminent. Ibant
olim milites in aurea veste sub Antio-
cho, in picta chlamide sub Sertorio,
in purpurea sub Cleomene, in expoli-
tis armis sub Catate, in rubenti sa-
gulo sub Artaxerxe, in candenti tuni-
ca sub Cyro, in scuto puniceo sub A-
gesilao, in fibulatis aureo caligis sub
Aureliano, in amictu argentea cruce
signato sub Constantino. Ierunt no-

Ari sub LVDOVICO, in veste non
ad delicias molli, non ad pompam,
ambitiosa, sed ad militare robur, &
pugnam accincta: ferro, non auro mi-
les indiget, bellum ardore geritur, non
nitore.

Interea dum vestem militum con-
templamur, nudata est suis arboribus,
vitibus, hortis, segete, sepibus, tota
quæ ad Rupellam est planities, distri-
buitur in classes, & manipulos exer-
citus, defixa signa, obtentæ pelles, sub-
stricta longo ambitu propugnacula du-
odecim, inter se fossis continuata; di-
positæ ex intervallo, vigilibus, & ex-
cubitoribus stationes descriptione mul-
tiplici, rotundæ, quadratæ, extantes de-
pressæ, proiectæ, subductæ, lunatæ, cy-
clicæ, hemicyclicæ, triquetræ, quadran-
gulares, variæ: perduellis denique ci-
uitas omnî à terra aditu prohibetur,
cauendum est tantum ne euadat O-
céano. Nondum, ut fatear, qua parte
vastissi

vastissimo sinu alluitur, conclusa erat, sed adhuc sedebat in portu, quia portum nondum classe tenebamus: quamuis enim ex utroque litore fortissima castella obicerentur, vnde multa, vno ordine tormenta in nauigia detonarent, peruium tamen erat mare, & facile vtro citroque commercium. Quis hanc Rupellensi eripiat facultatem? Venerunt quidem suppetias exteri, vt hostem ab insulis nostris expellerent, sed serius appulerunt, siue quod grauiores naues ducerent, siue quod obsessam insulam (quam ream esse omnes intelligunt) vnus **LVDVICVS IVSTVS** posset absoluere. Et si verò nostra felicitas inuidit illis victoriae gloriam, hoc tamen fortissimi iudicandi sunt, quod soli mare tenuerint, quod eos non expectauerit Anglus, quod nullus obtiterit; & qui tardius venissent, prius vicerint hostem, quam viderint: est in experti temerè in nego-

tia ruere: lentè festinare, sapientis. At
 at, dum ista præsidia moras trahunt,
 tenet Oceanum Rupellenfis, eripien-
 da sunt illi maris effugia. Hùc agite
 vestros myoparones, minutissimosque
 pontones Armorici, hùc scaphulas, &
 lembulos Aquitani; hùc aphractula,
 & actuariola Cantabri; plus Gallus po-
 terit in liburnis, quàm in rotundis, &
 constratis nauibus Anglus. Ita factum
 est, non sine omnium stupore, navigi-
 osis lembulis, myoparunculis vectari-
 olis, celocibus, celeribusque cursoriis
 mare tenuit LVDOVICVS annum
 ipsum pugnare paratus, si hostem is
 animus habuisset. Quis credat epiba-
 dibus cataphractas, lintribus rostra-
 tas Britannorum classes sustineri po-
 tuisse? Fuerit illud ad fortitudinis spe-
 ciem, erit quod sequitur ad terrorem.

Non satis erat classibus insultasse,
 nisi insuper insultasset Oceano: machi-
 natus est igitur aliquid quod homines
 satis.

letis mirari non possent, ipsa maria
 pertimescerent. Intelligitis quò mea
 spectat oratio, iamque suspicitis ædifi-
 catum in æquore vallum illud, carce-
 ribus frenatos impetus indomiti ha-
 ctenus pelagi, ne rebelles à iugo se
 liberos forcè putarent, vbi mare liber-
 tatem amisteret. Quis posterorum
 cum legerit, humano consilio factum
 putet? quis perduellium, cum viderit
 neget pelagus iustitiæ stipendiis mili-
 tasse? quis barbarorum cum acceperit,
 testes oculos non adhibere volet ad fi-
 dem? Illi ipsi qui quotidie, videbant
 formidabiles illas moles, qui pedibus
 calcabant, qui militares in illis excu-
 bias agebant, suis sensibus non creden-
 tes eò laborabant persuasione pertin-
 gere, quo Regis fortitudo peruenit.
 Facienda moles erat, quæ totum susti-
 nere Oceanum, nec fluctuum assulti-
 bus verberata, nec æstus inundationi-
 bus superfusa, obrutaque titubaret. Pii

Principis erat, hoc patrare miraculum,
 nemo id si maximè vellet, præstare
 potuit, præter LVDOVICVM XIII.
 qui primus voluit, quod potuit solus.
 Mare impatiens operis videbatur, nisi
 immensi laboris potentiâ victum esset;
 disceretque per gradus subigi, & sæui-
 entis freti inclementia imperioso freno
 còèrceri. Vnius numinis est, mutare se-
 des elementorum, æternosque rerum
 cursus obice temporario sistere: patet
 DEO natura omnium parens, cæteris
 hominibus imperat, Summa erat alti-
 tudo maris, sed altius ahuc Regis in-
 genium; rapidus vortex, sed stabile
 consilium Ducis; dubii casus, sed cer-
 tus, & constans militis animus, varii
 vnd equaque metus; sed vna omnium
 spes, facilius esse nostro Principi, quæ
 vellet efficere, quàm, quæ efficeret vel-
 le, qui rerum successus sua voluntate
 definiens, etsi maiora quàm cæteri o-
 mnes fecisset in Gallia, fecerat tamen
 semper

semper minora, & minora viribus suis. Quid? iaci coepit illius prodigii rudimentum quâ parte fretum erat angustius, satis longo tamen intervallo ab Vrbe distitum, ne si remotius esset, architectorum laborem vinceret profunditas aluei; si vicinius, labore hostium vinceretur, & noceret propinquitas teli. Principio igitur defixæ sunt ad continendam futuram struem parte omni trabes ingentes, aliæ transversæ & decussatæ; vt demissos lapides ingeniosis quasi brachiis amplecterentur; erectæ aliæ, vt primos impetus frangerent, vndas supercilio deterrent; quædam in quadrum ductæ, commissæque quadrando; stabiliendoque operi, quædam in propedem, talumque proiectæ, vt illa machinarum decliuitate, mollique deiectu clementius fluctus exciperentur, ipsosque inoffensos, inoffensa molitio refunderet pelago Ingessa subinde generis omnis sabur

ra, maxima vis lapidum temerè iacta
 in profundum, superaddita cumulo
 prægrandia pondera, nondùm tamen
 oppleri potuit barathrum, sed dum
 helluatur accepta, nouis pabulis inhi-
 at, quin ponderibus attolitur, effun-
 ditur, & amplificatur in vinculis: in-
 saturabilis, nempe quædam est fames,
 inexplebilis alueus, & alius Oceanus
 parte omnis fauces aperit, quæ pabulũ
 obieceris, hæc vorabit, & saturitate
 voracitatem accendet. Quis illius in-
 temperantiæ modus sit, & finis diffi-
 cultatum? opposita quidem fluctus e-
 luçtabantur repagula, sed adhuc solu-
 ta machinatio sine compagibus erat,
 sine commissura, sine cemento, suis
 tantùm librata, firmataque ponderibus;
 hiabat male materiatus murus, aquas
 transmittens; conserti sine ordine la-
 pides cum fluctibus voluebantur, &
 trahebantur in præceps; temeraria de-
 mum, & indigesta illa substructio, nul-

lo nixa fundamento, hosti risus ciebat, metum afferebat militi, animos addebat Regi, qui malit cum natura luctari, quam cum fortuna triumphare. Neque verò diu stetit sine nexu fabrica, sed seiplas aquæ prodiderunt, quæ dum se in rimas saxorum insinuant, & crudum parietem interluentes tentant inconditam laxare compagem, secum scenosam vlliginem conuectabant, & luto, quouis glutine tenacioris congeriem aridam officiosè adstringebant: peritum murum repererant, sed aquis succedentibus limo incruiatum relinquebant: transibant fluctus nunquam redituri, & rimas implebant, qui labes facturi videbantur immanes. Quid porro? hætenus successerat labor, sed (vt fert natura magnorum operum) difficultas crescebat in manibus, & quæ fuerat initio maxima, maior erat in progressu: Etenim quò magis ab utroque litore molitio

rece-

recedebat hoc gurges altior erat, &
 quemlibet aggerem vasta vorago sor-
 bebat auidius, æstus ipse turbulentiùs
 agebatur? insana fluctuum volumina
 medio alveo atrocius bæchabantur
 nostraque repagula quasi sibilis explo-
 debant, mugitibus indignabantur. iam
 deficiebat materia qua tam ingens
 charybdis impleretur, & nisi latomiz
 fuissent supra quàm credi potest vber-
 res, & fœcunda, periculum erat ne
 lapidum penuria fabrica nostra pende-
 ret, sed tam diues vena fuit vt ipsa
 saxa sub manum, ferrumque subole-
 scere viderentur, cœdum esse dixis-
 ses lapidum nemus, quod depastum
 syluesceret, grandesceret imminutum:
 Hac tam fertili, & copiosa officina
 fretus maturare cepit Imperator ob-
 sidionem aquarum, lapidicinas recen-
 tes aperiri iubet, nouas rupes excin-
 di, omni contentione opus vrgeri, con-
 ferri fragmina montium, syluas adhuc

ings-

ingeri, totas terras vndis inferri, gle-
bas saxis, saxa aggere, aggerem ne-
more, nemus scopulis, scopulos mon-
tibus aceruari: obuiam igitur materi-
am pro se quisque rapere, molaria pon-
dera in mare voluere, terræ penetra-
libus pelagi viscera saburrare, elemen-
tum elemento confundere. Stetit illa
tandem vasta, operosaque substructio,
veluti porticus toto eminens pelago
continenti ordine fabricæ, nisi quod
in medio salo apertus erat tolerabilis
aditus, ne omnino maria desperarent.
Nolebas enim prohibere, **REX PRV-
DENTISSIME**, ne fluctus laberen-
tur vltieris, sed cohibere rebellionē,
ne iterum elabi possent; duxisti quip-
pe ab utroque litore molitionem di-
rectam, sed medio alueo pendere ius-
sisti abruptum opus, aggeremque con-
tinuare noluisti, vt omnes intellige-
rent, non quantum posses, sed quantum
velles fecisse te; qui poteras ~~estum-~~

frenare qua iussisses, cui viam face-
 res quâ volebas. Iter undis reliquisti,
 ut rupto muro contumacem urbem
 cumulati fluctus inuadentes, perge-
 rent ad rebelles, tuæ fortitudinis nun-
 tii, spumantique fremitu loquerentur,
 quàm agrè, sinuoseq; transissent: Quan-
 quam enim medio moles hiaret Oce-
 ano, defendebas tamen intervallum
 illud, multiplici lignearum, machina-
 rum ordine, & hinc quidem quâ se-
 mare latius aperit, longa serie cande-
 labrorum, ut vocant, naufragiis præ-
 lucebas: Inde verò quâ itur in Urbē,
 demersis, onerariis, iunctoque navium
 inædificatarum rudente, hiatum inclu-
 seras, ut nullus accederet, qui firmita-
 tem operis non probaret, ibiquè for-
 tior esse videreris, ubi vel robur muri
 defecisset. Sic mare navibus, freno
 machinis, obice, milite, ponderibus te-
 nuisti. O conuulsos cardines rerum!
 O domitas naturæ vires! O humana
 mira-

miracula! hæsit in lubrico firmissima
moles! non fluctuauit imposita flucti-
bus! vortices fregit ipsa non fragilis!
ruentis pelagi fremitus audit statio
surda, quæ dum obluetatur oceano,
argumentum furoris est hosti, exem-
plum constantiæ militi. O nunquam
audita prodigia! itant aquæ! fluctus
ipsi pendent! credo admiratione
librati, contra natant terræ, non nu-
tant tamen, sed in naufragio portum
tenent! Nostri milites pedibus ire,
qua nulla præcessit exemplo, nulla se-
quutura sit atas ingenio? tormenta ra-
pere quæ vorticè rapitur vnda cita-
tior! excitare tempestates in sicco!
portum in tempestatibus collocare!
ignes in aquis accendere! terris ma-
ria sociare! Est adhuc in ista oppu-
gnatione, quòd plura quàm expecta-
remus, regem perfecisse miremur, nec
illis similem extitisse, qui nihil detre-
ctent, dum nihil impleant operis. Sa-
tis erat nobis, si superioribus annis

prætendi freato catena ferrea potuisset,
 quæ maris commercio interdiceret ho-
 stibus; vt autem Rex tot onerarias in
 mare demergeret; vt tot muralibus
 machinis, missilibusque litus vtrumq;
 defenderet: vt trabes illas solidissimas
 nexis capitibus excitaret: vt crudo ag-
 gere, glebisque structilibus tam firmis
 Inctamen procellis obiiceret; vt super
 his malibus, fluctuantique vallo suum
 armamentarium collocaret; vt sine
 classe, classem Anglorum, classem vn-
 darum, classem turbinum retardaret,
 nullus ausus esset optare. Rex solus vo-
 ris omnibus maior, reflantibus licet A-
 quilonibus; & contra nirentibus fru-
 stra tempestatibus perficere potuit.
 Quoties enim procellas infremuisse pu-
 tandum est, & immanes aquarum mo-
 les nostris malibus opposuisset vt canes,
 sic fluctus obiectis lapidibus adlata-
 bant; morsu inuadebant, sed inani; Ir-
 ruebant odio turbulenti, recedebant
 metu.

metu exalbescentes, & spumei, viso
hoste timidi, qui ante pugnam tumidi
ferebantur. Alii repulsam iniquè fe-
rentes, immani se supercilio tollere,
vallum saltu transmissuri; alii verso in-
succedentes vndas furore eas vortici-
bus absorbere, tardare, & fugare se in-
uicem, vt postremum agmen in bello
sisti, fugariq; solet, cum fractum pri-
mum occurrit: Illi furere acrius, & ro-
ties victi, roties rebelles, renouare con-
flictum; Isti demum despondentes ani-
mo, se victrici moli submittere, & tu-
more in reuerentiam mutato libare o-
scula, blandisque illapsibus adulari.
Scio multis olim fluminibus impositos
pontes, & sæpe calcatam à magnis Im-
peratoribus aquarum esse superbiam,
sed hi omnes aut in opere statim, aut
breui ab opere corruerunt. Iunxit Hel-
lesponti quondam angustias connexa
classe, celebris ille Persarum ductor,
sed quid factum illud habet miraculi,
cum

cum hæc sit natiua classium sedes? simili nauium contabulatione Baianum sinum strauit tertius ab Augusto Imperator, sed utrum maius uiderur, puppes intulisse, vel terras Oceano? fecit in Munda flumine Iulius Cæsar strage cadauerum aggerem, sed ipsi fluctus mutauere colorem suum, illum obicem erubescences: Adiit quoque Tyrum Alexander nauigabili ponte iuncturus insulam continenti, sed diu fluctuauit illud opus sine fundamento, idq; semel hostis incendit, non semel æstus abripuit. Legimus etiam saxeis pilis castigatam à Traiano, & Constantino Danubii Rheniq; ferociam, sed arduum non est fluuiis silentibus insultare: aquas Baias ad Auernum lacum deducere tentauit Nero, sed hoc potius conducti fossoris inuentum est, quam Romani Imperatoris, qui tantillo tamen negotio victus, opus abiecit. Vni quippe LVDOVICO concessum est ex o-

mnibus hominibus, non accersere riuos non fossas ducere, non aquas auertere, non pontes iungere, non naues copulare, non paludes exhaurire: (in quo quæ potest esse tanta victoria?) sed ipsos fluctus, quàm spurci sunt, maria, quàm procellosa, tempestates quàm turbulentæ, obice facto concludere. Velit fortasse in laudis istius partem Maximianus Imperator accedere, quæ Rhetor Belga nescio quis, Galliarum Urbem portu insignem oppugnaturum, defixis in sinus aditu trabibus, saxisque ingestis, inuium nauibus locum reddidisse commemorat: at illa claustra (ut eiusdem Rhetoris verbis utar) qui primus insiluit æstus, irrupit, totaque hæc obiecta fluctibus moles, quasi ligao dato, ac peracta statione dilapsa est. Nefas est autem simile quidpiam de nostri Principis opere suspicari, ibit miraculum istud ad posteros? seseque ferent immortali fronte nostra repagula, fortiora

tiora precellis omnibus, ipsoq; profundo profundiora. Optarint Maiores nostri, vt istud aliquando fieret, quod ipsi facere nequiverunt: scient nepotes fieri posse, quod factum est: furoris sui terminum inuenerit pelagus, terminus hic, terminum non habebit: monumenta fient, postquam claustra esse defierint: poenas qui viuunt rebelles sentient, qui venturi sunt aliquando perimescent: docebitur omnis ætas sponte verti elementa, vt rebellionem euertant, ruere fluctus, vt hæreticos obruant, qui pati noluerint Regis Imperium, quod mare sustinuit.

Sed parco prædicare victoriam quamdiu cum hoste pugnatur. Ecce enim Anglus turbat adhuc, quantum superiori bello ad Ream insulam imminutus est viribus, tantum creuit audacia, superbus dum corruit, animosus dum multatur. Nondum se à proxima clade receperat, cum victoriis nostris institutus

stitutus ad prælium tentauit semel atq;
iterum nostras vires primò facta ex-
cursione, tum simulato impetu cona-
tus perrumpere magis repagula. O sto-
lidum, & abderitam! quasi cum fir-
missimo muro, cum numerosissimo e-
xercitu, cum potentissimo Rege, illum
sustinere non possemus, cuius classem
antea sine nauibus fregeramus. Quan-
quam vt video, furore rebellium ad
istam impudentiam animatus est. Ere-
xerunt enim pro muris, proditores
Patriæ Rupellenses, vexilla Britannica,
ô infamiam! victos, victi ipsi vocarunt
in auxilium, ô dementiam! Lutherana-
nos, Calvinistæ! Ciues exteros! Galli
Anglos! ô desperationem vltimam! ea
vos signa sustulisse (nefarii deserto-
res) quæ recens nostro militi ludibrio
fuerant! scilicet illa vos oportuit ex-
plicare, tum vt barbarorum esse, non
Francorum illud scelus ostenderetis,
tum vt Rex noster duos hostes vno
bello

bello conficeret, sic enim visus est eodem tempore Gallos in Anglia, Anglos in Gallia vincere. Venit fulminaster Anglos, stetit in conspectu citra iactum tamen, quia ferire noluit, sed aspici: prospecta nostra mole hæc attonitus, illac suos milites aditum inuenturos non credidit, qua vix ipsi fluctus viam haberent, ratus oclusam esse nauibus mare, patere naufragiis. Explicate tandem Britanni Consilium vestrum, quæ causa aduentus fuit? quæ tam diuturnæ moræ? quis arcanum illud aperiat? aduolastis celerimè, diutissimè stetit in anchoris: vela explicuistis, animos contraxistis: signa multa, signifer nullus apparuit: Leopardos vidimus in vexillo, lepores experti sumus in prælio: quàm similes vobis, Angli, quam vestris nauibus dissimiles exitistis! vos animo pumiliones, illæ cogmentatione, proceræ, hoc solum habuistis cum illis simile, quod il-

la rar.

Iæ tardæ ad motum erant, vos ad prælium tardiores. Ænigma fuit aduentus vester, planèducendi fuerant divinatores qui soluerent. Alii non nau-machiam, sed Bacchicam expeditionē esse dicebant, vino Aquitanico metuendam, in qua plus meri fundendum esset, quàm sanguinis: Alii visendæ ob-sidionis, alii orandæ veniæ gratia, nemo prælii causa venisse suspicabatur: Qui semel fractus est hostis contemnitur, non timeretur: ac nisi prædones in nostras insulas emisissetis, dubitare posuimus essetne hominibus vacua clas-sis vestra, quæ in oceano velut in mari mortuo iners, & otiosa consisteret. Pudit illos tandem ignaviæ suæ: re-verti in Angliam sine vulnere noluerunt, facturi plagis fidem audaciæ. Quis eos fortes putaret, nisi prouocante hoste pugnassent? quis cum Gallis crederet contēdisse, nisi vulnerati redirent? Simulacrum ergo exhibere prælii, quod

quod ut magnum non fuerit, fuit tamen honorificum nobis, Rupellensibus Britannisque fatale: deduxere naues in aciem, explicuere vexilla, machinas disposuerunt. Gratulari sibi tam beatam diem milites nostri, se victores dicere, ex quo pugnare liceret, increpare tarditatem hostium, votis occupare conflictum, equites littus tueri, pedites molem: alii Rupellensibus opponi, qui exciperent erupturos: alii ad Anglos præmitti, qui segnes irritarent: quid? lacessitus Anglus celoces incendiarias ipse frigidus in nos misit: signum dedit buccinâ, sed receptui: tonitru tormentorum edidit, quanquam non surdi eramus ad prælium: fragore pugnavit, & sibilo, sed contra ventos: bombus fuit præterea nihil. Tormenta audiuius, non sensimus: ignes aspeximus, sed fatuos: fumum vidimus, sed qui nobis splendorem afferret, hostii eliceret lacrymas: ardebamus

mus animo, dum pice, sulphureque lucebat: lucebamus in armis, dum Andabata pugnabat in tenebris. Quid tu interea LVDOVICE? qua diligentia simulanti pugnam Anglo occurristi? qua prouidentia tot naufragos ignes auertisti? qua prouidentia terra, marique legiones instruxisti? quàm aptè librari machinas, quàm opportunè displodi imperasti? quàm vnus fuisti, quàm multiplex? quàm diuersus in vno, quàm vnus in omnibus, cum simul Anglos lacefferes? simul Rupellenses obsideres simul de vtrisque triumphares? Ecquem verò nobis de tua salute metum iniectum putas, cum tot periculis caput obliiceres, & tuo capite salus totius Gallix verteretur? Meminimus, militi speculam tibi editam molienti, vnde citra periculum periclitantes videres, iratum, imperasse te opus illud continuo destrui, cumque omnes à te deprecarentur periculum, addidisse: nol-

le te æstimari de milite, nec per quæ triumpharent cæteri, vincere: sed per quæ ipse vinceret, cæteros in otio triumphare. O si animus ille pugnasset! quæ hosti vulnera, quæ exempla militi, quæ argumenta dedisset historiæ? Sed qui hunc ardorem aspexit, incendium timuit, imò tuo vnus conspectu subactus hostis, recessit in fluctus, ne si appulisset, pateretur in terra naufragiū.

Quid ad hæc fœdisragus Rupel-
lensis, toto mari prohibitus, terris om-
nibus depulsus, orbe conclusus an-
gusto, & orbe exclusus vniuerso quas
restes iugulis attemperabat? quæ in
mari voragines ad præcipitium vesti-
gabat? Imminebant Vrbi per gy-
rum duodecim horrenda propugna-
cula, quæ terrerent aspectu, fulminibus
terrerent: cernebantur tumulis impo-
sitæ longis suspectibus speculæ: ardui
fossarum antractus descensu ipso diffi-
ciles, ascensu insuperabiles occurre-
bant

bant: videbant inclusi perduelles enor-
 mia sibi quotidie parari ergastula, sta-
 taria castra dies lxtos in pellibus du-
 cere dispositas esse omni parte execu-
 bias: obucebantur pro lorica castro-
 rum munitiones lunata, cæmentitiæ
 gerræ, crudæ opere cespititio substructi-
 ones, casæ subterraneæ, valla protu-
 berantia: patebant liliata Gallia signa,
 quæ vel in suo candore perstringerent
 rebellium oculos: succedebant sibi ma-
 iori portento, quàm fide continuata
 miracula. Præterea nulli accessus nisi
 ad pugnam; nulli exitus, nisi ad exiti-
 um; nulla colloquia, nisi ad deditio-
 nem faciendam; miles vndique, & vn-
 dique miles: arcem fossa, fossam val-
 lum, vallum speculæ, speculas statio,
 stationem desperatio, desperationem
 furca vno mortis tenore, ordineque
 fatum excipiebat: tenebantur deni-
 que fossis, aggere, vallo, ferro, cune-
 is, agmine. quid facerent? sed hæc tan-

tum mali præludia. Accedebat vltima
 fames, telum quo nullum est, in bel-
 lo crudelius, quia simul ignauè, & a-
 trociter perimit. Iam commeatus o-
 mnis erat absumptus; herbarum fibris
 solati erant in ediam; radices in hor-
 tis, mures in rutis cæsis domorum,
 canum, equorumque morticina defe-
 cerant in stabulis, frixum, elixumque
 atro iure corium, & maceratas ocreas
 deuorauerant; letales venenorum suc-
 cos in cibum verterant, in deliciis erat
 cicuta, auro toxica vendebantur; ci-
 tra pretium erat quod citra horrorem
 dici non potest, difficilius erat viuere,
 quàm perire, & in funesto illo mortis,
 vitæque confinio, nec viuere licebat,
 nec mori. Nihil tam præsens quam
 fatum, nihil tam remotum erat: lon-
 ga tabo longiora crimina multaban-
 tur: vita trahebatur ambage malorū,
 & multiplicatis funeribus multiplica-
 batur in pœnam: mors denique cum

vita

vita consenserat, illa ut verum, hæc ut supplicium fieret. Tam misere hæretici viuunt, tam ægrè rebelles intereunt. Reptabant in compitis homines strigosi, macilenti, capulares, sine carne pelles, exanguia silicernia, tenues vmbrae, imitationesque viuorum, pallida mortis exordia, inanēs corporum folles, ossium malè congesta compago, continuati ossibus nerui, vacui vētres, & queruli; viri, non iam viri, sed ferales hominum larua. Malè ominosus erat occurſus Ciuium, crescebat mutuo aspectu calamitas, dum quisq; legit exaratam in alterius fronte capitis sui sententiam, & tanquam in mortis speculo, imminentis iuneris imaginem intuetur: alter alteri mortem diuinæ ultionis fiebat exemplum. Se morti occurrisse putabat, qui in fratrem inciderat: omnes longa macie torridi videbantur, multati reorum vultus, cadauerosæ frontes, recedentes

oculi, consuta genæ, ieiuna labia, otiosi dentes, & longi, subductum mentum, hiantes fauces, & aridæ. Dign'erant tali ieiunio, ieiuniorum nostrorum irrisores. Quid plura vel ipsa mors visa est laborasse fame, ita ventre infaturabili omnes helluabatur in Vrbe: funeribus funera cumulabantur: mors desierat esse terrori, Ciuibus, quam vsu quotidiano, domesticaque consuetudine familiarem habebant: timore sublato desperatio succedebat: calcabantur temerè, & sine horrore mortuorum acerui: non lugebant aliorum mortem, qui suam expectabant: nihil filius patris obitu mouebatur, quia naturam fortuna mutauerat. Vnum omnium votum perire cito, metus longius viuere, solatium quamplurimos socios mali futuros. Proiecta iacebant interea, in sepulchralibus viis sine sepulchro cadauera, & nuda humo, nuda ossa voluebantur: cœlo tegebantur

tur corpora, quorum animæ apud inferos flammabantur: domus in sepulchra transferant, tamen erant omnes insepulti: nulli qui efferrent aderant, soli occurrebant qui efferrentur, hæredes morientibus nulli, nihil ipsis etiam vermibus iure funerum relinquebatur: qui bonis succederet nullus erat, malis vniuersi succedebant. Præterea dicebatur receptos Anglos, eo venisse furoris, vt vel eruentis hominum artibus pascerentur: ferales nescio quas matres, quo effuderant vtero, eodem filios recepisse: alios corpus suum aluisse minuendo: inuentum esse puerum qui famem crudis demortui fratris carnibus satiaret: salita esse distractorum quorundam militum membra, similiaque voracitatis portenta occultè memorabantur. Rupella denique in carnarium versa erat: veros Tydæos & Menalippos, renouatas Busfiridis aras, furiosaque Diomedis præsepia videba-

mus. Nulla in Vrbe salus, quod Ciues
tot Sandapilarii, tot Massagetum po-
pæ, tot carniuori Cyclopes, tot esse
funesti carnifices credebantur. Hic a-
missum filium in mortuorum aceruo
quasi publico spoliario quærere; hic e-
nectum fame abiicere, hic discerptum,
& laniatum suspicari. Omnes deniq;
plus caninam libidinem dentiû, quàm
mortem ipsam, famemq; timere: Quid
inquam, facerent? in restim rei summa
redierat; sola supererat obfesso, aut cle-
mentia Principis, sed noluit experiri: aut
proprii ferri voluntarius rigor, sed clam-
perire non meruit. Vbi grandes illi
spiritus, quibus nostros exercitus dif-
flare posse credebatis Hæretici? vbi
folles illi minarum magnificæq; verbo-
rum pompæ? vbi supercilium illud, cui
tantæ victoriæ, tantæque tragoediæ ni-
tebantur? O rerum conuersione! o im-
prouisam calamitatem, tantis tamen
criminibus debitam! ô famem! ô furo-
rem!

rem! Ô lanienam! Fidem iam habeo
 annalibus, cum Cambysis exercitum
 referunt eo fame fuisse compulsum, vt
 decimus quisque miles sortito maectare-
 tur, fereulum inhumanum futurus:
 non inficior eo venisse calamitatis Ro-
 manos, cum obsiderentur ab Alari-
 co, vt in Circensibus ab Honorio Im-
 peratore flagitarent, humanæ carni pre-
 tium poneret: non nego Cassilinos eò
 angustiarum redigi potuisse, vt apud il-
 los mus ducentis nummis vnus venie-
 rit, cum Hannibal immineret: non re-
 uoco in dubium Calageritanorum ine-
 diam, qui ne in Pompeii manus veni-
 rent, vxores suas, liberosque sale con-
 dierunt ad pabulum: non duarum mu-
 lierum illarum furorem, quæ Romæ,
 oppugnante Urbem Vitige, septem su-
 pra decem milites iugulatos deuora-
 runt: non Iudæorum decantatam il-
 lam cladem, qui absumptis denique o-
 mnibus, ad sterquilinia, coenumq; con-

uersi sunt. Fidem horum omnium fa-
 cit Rupellensis calamitas Saguntinam,
 Perusinam, Melitanam, Constantino-
 politanam, Lydiam, Hierosolimita-
 nam, Potidæam famem datur aliis le-
 gere, nobis datur intueri, dum Rupel-
 lensem videmus. Negotiosus interim
 in otio miles noster, habitabat in te-
 cto, sine armis præliabatur, Urbem
 obsidebat oculis, ludens vallabat, pa-
 cem alebat hoc bello, bellum hac pa-
 ce conficiebat, relinquebat hosti mori-
 endi spatium: Quamquam eos perire
 noluisti, Clementissime PRINCEPS, qui
 sponte perierunt, ne tuo beneficio vi-
 uerent: perditos ita perdidisti, ut ultra
 fauire non possent, neque tamen ita
 fauisti, ut omnino perderentur: Ira-
 tus es illis, ne diucius furerent; latif-
 simo ambitu conclusisti; ne premeren-
 tur; vallasti, ut custodires; custodisti si-
 ne cæde, ut ipsi sua sponte cederent;
 fecisti denique sine inuidia sanguinis,
 quod

quod à me dictum sine inuidia mendacii nulla postea natio crederet. Prædicabitis posteris bellicosam illam quietem, & pacem expugnatricem, dum agros sanguine naufragos, terras cædibus erubescences, exhaustas habitatore prouincias, fluuios madato cadauere retardatos, famosasque laniena uictorias duces barbari prædicabunt. Tant illa gladii lucra, non sceptri; furoris irritamenta, non belli præsidia: virtute, non crimine bella geruntur. cruce victor impotens, clementia moderatus vincit. Ergo noster Imperator pace maluit incruenta, quam funesta palma potiri; maluit vincere, quam necare. ✠

Non te mouet hæc pietas, desperata Rebellio? resistis adhuc tot fracta virtutibus: Cede, Rupella, cede clementiæ, nisi parueris cessura iustitiæ: Viue Regi, vel morere tamdiu rea, quamdiu clausa: tam improba, quam hæretica;

rica; disce occumbere, cum pudore;
 quæ sine fronte vixisti; disce cadere,
 quæ toties cecidisti. Anglus desperat,
 Soubifius exulat, Rohannus tenetur,
 mare concluditur: omnia te ad exiti-
 um rapiunt, fames enecat, Rex obfi-
 det, conscientia exanimat, quid dubi-
 tas? pone superbiam metas, pone modum
 audaciam. Restitisti rebellis, cedendum
 est Principi. Cessit, portas aperuit, Re-
 gem accepit. Triumphare Galli, LV-
 DOVICVS superavit: fortitudini re-
 giam ignava superbia, pietati perfidia,
 pertinacia necessitati succubuit. Im-
 minebat hyems; absumptus erat omnis
 commeatus; reditum parabat in Angli-
 am tam sæpe fractus Britannus; Acce-
 debat in dies ad regia castra volun-
 tarius miles, exaggerabatur magis ma-
 gisq; moles in Oceano; audiebantur in
 Vrbe miserabiles morientium voces,
 muliebres ciularus, clamores incondi-
 ti, tristesq; vagitus projectorum infan-
 tium;

tium; populabatur Urbem totam cum-
 mulatis funeribus fames; Ciues ad vi-
 ginti millia extremâ inediâ interierant;
 nihil intererat, hostem acciperet Ru-
 pella, an retineret, grassabatur peior
 omni malo desperantis militis imma-
 nitas, omnia sibi licita putabat furor
 publicus, vbiq; dabantur funestæ tra-
 gædiæ; citiùs sepulchra, quàm domos,
 cadauera, quàm homines inuenisses:
 mors locis omnibus occurrebat. Prò
 funestum, tragicumque spectaculum!
 Tandem Rupella tot oppugnata cala-
 mitatibus, expugnata est; submitit se
 Principi, triumphatorem admisit. O
 nobilem, ac fortunatam victoriam! O
 triumphum nulla ætate silendum! quo
 Aquitania pondere, quo opprobrio Gal-
 lia, qua peste Religio liberaris! annum
 obsidio tenuit, victoria sæculis omni-
 bus permanebit. Viuet typis Rupella,
 quæ criminibus occidit: sibi perierit,
 posteris non peribit; corruit nostro tem-
 pore,

pore, æternitati stabit. Huc stylum,
 huc nobiles curas historici. Narrate
 populis rebellium funus, daturum im-
 mortalitatem historix; fatum nescient
 scripta quæ fatum hoc ferent. Quan-
 tus accedet splendor annalibus, cum
 reuerendis Ducum nostrorum nomini-
 bus augebuntur, & populorum exempla
 fient memorabilia facta Gallorum? At-
 tollet se in mediis historix monumen-
 tis sereno vultu, ætate vegeta, eggre-
 gia dignitate DOMINVS Regis frater,
 qui multo plus quàm cæteri omnes læ-
 ratus est ob bellum illud confectum,
 cui felix ipse initium dederat: ardebat
 ille quidem conficere opus tam ardu-
 um, sed illud intellexit vnus Regis fe-
 licitati, ac fortitudini reseruatum. Et
 quidem argumentari possumus ex tam
 beatis exordiis, quid facturus fuisset in
 progressu: & vel ex hac vna expedi-
 tione conicere, quæ Regis fuerit de
 optimo fratre opinio; summæ quippe
 diffi-

difficultatis est, magnis rebus dare principia, & peritissimi architecti iacere ingentis fabricæ fundamenta. Eminet præterea immortalis charactere Hærici Borbonii, Condæi Principis, inclytum nomen, qui cum Regis curas externis simul, & Ciuilibus bellis diuisas esse videret, eiusdem auspiciis profectus est in Galliam Narbonensem, & belli, gloriæq; socio celeberrimo illo Duce Mommorancino, cuius quot hostes, tot uictoriæ memorantur, repressit fortiter coniuratos hæreticos, signiferum factionis obsedit, Montem Regium, Fanum Seueri, Castronouū, Calnam, Brassacum, Cresselium, Castrum Urbem, & Mazametæ vallis pentapolim occupauit: cepit ad triginta quæ Urbes, quæ castella rebellium, quodque superat admirationem triduo Apamiæ illam amplissimam, munitissimamque Ciuitatem expugnauit: quantum deniq; Rex imperauit, tantum imple-

vit, vt hostes intelligerent, nihil prin-
 cipum viribus, nihil Regum Imperiis
 esse difficile. Tum sublimi se vultu ef-
 feret posteritati venerandus Cardina-
 lis Richellæus, qui virtute quam no-
 mine ditior, cum ceteri manu, ferro-
 que rem gerent, exemplo consilioq;
 pugnabat, incomparabili vit ingenio,
 singulari prudentia, pietate spectabili.
 Habuerint sanè conspicuos Pontifices
 maiores nostri: non inuideo dum vnus
 sit instar omnium Richellæus. Oppo-
 suit olim Italia suum tyrannis Ægidi-
 um prudentissimum Antistitem: Gallia
 Turpinum Sarracenis: Hispania, Xi-
 menem: Mauris: Aquitania: Geraldū
 Lemouicensē Anglis, Bohemia Ioan-
 nem Pragensē Hussitis, Hungaria
 Gregorium Martinusium Ferdinando,
 Dania Absalonem Londesum Slavis,
 Germania Huldricum Hungaris. Vnū
 deinceps nostra tempora, omnibus op-
 ponat hæreticis Richellæum. Neque

verò

verò hîc stabit cursus annalium, quia non stetit hîc animus, & fortitudo Gallorum. Legentur quoq; cum admiratione Caroli Valesii, Ducis Engolismensis præclarè facta, qui cùm Ruppellæ admouisset exercitum, ante Régis aduentum Urbem cinxit, & iamdiu emeritus, de Gallia tamen bene mereri non desit, laborem labore continuans, belli principio iunxit exitum, perpetuum hosti, vel otio certamen indixit, etiam cum cessaret occupatus. Scipionem præsertim legentibus afferret Schomberge præstantissime, cuius incredibilis ad bellum animus, mihi quoque addit animum ad dicendum. Sed ferro stylum, manu ingenium vincis, siue enim te procellosissimo mari credis, cymbâ vectus oxigua, & turbines, tempestates, naufragia, classes hostiles, mortem eluctatus, ad obsessas insulas penetras: Siue cum parua militum manu confertas Britannorum copias, & præ-

præsidia fundis, maiora quædam ho-
 mine facere videris, & nos quasi mi-
 raculis quibusdam opprimere. Venies
 etiam in partem laudis Marilliace, qui
 venisti in partem laboris, scient ven-
 tura tempora quos hostes ad Ream
 fregeris, quæ pericula adieris, quæ Gal-
 liæ trophæa crexeris. Tuque Thotasi
 inuictissime, quem dudum gestio no-
 minare, Tu quamdiu manebunt literæ
 (manebunt autem perpetuò) tamdiu
 vindex patriæ, hæreticæ vltor audaciæ,
 Dux citra inuidiam maximus vno o-
 mnium ore prædicaberis. Esto Rex in-
 sulæ propugnacula euertantur, stabunt
 tuæ gloriæ monumenta: neque verò
 poterat tanta virtus loco tam angu-
 sto contineri, cui laudis campus para-
 batur immensus. Vigeant deniq; me-
 moriâ seculorum omnium cæteri no-
 biles Galli, quorum animis etsi defu-
 erint hostes, nullo tamen tempore de-
 futuræ sunt laudes. Obiecit illis Rex

maria!

maria? sine nauibus transmiserunt. An-
 glos opposuit? continuo profligarunt:
 molem in æquore heri imperauit? oce-
 ani altitudinem cumularunt. Quis ho-
 stes constantius expectauit? quis forti-
 us excepit? quis celerius occupauit? quis
 inuasit audacius? quis animosius fudit?
 Mirabuntur exteræ nationes, stupebunt
 posteræ, Religio triumphabit. Discens X
 hæc miracula pueri, iuuenes recitabunt,
 viri conabuntur imitari, fenes narra-
 re gaudebunt, ætas nulla commenda-
 re desinet. Pictor vel ipsa tantarum
 rerum umbra suas tabulas illustrabit:
 Sculptor victorias illas durabit in mar-
 more: mirabitur eloquentiam Orator
 huius unius argumenti magnitudine
 superari. Pœta cui hæc solida suppe-
 tent, cessabit inania prodigia fingere:
 Dabitur demum omnibus prædicare,
 quæ pauci fecerint, paucis facere, quæ
 prædicent uniuersi. O te ergo non tu-
 orum minus, quam tua ipsius virtute
 feeli-

felicem TER MAXIME LVDOVI-
 CE! Tuis enim triumphis, quanta sūt
 ista, quamque præclara ducum facino-
 ra militant, qui vt maiora fecerint,
 quàm ausi essemus optare, quoties ta-
 men in te vnum intuentur, fatentur
 vltro se infinitis gradibus minora fe-
 cisse, quam ipse exemplo fieri posse
 docueris. Vniuersi demum rapiuntur
 in tuas vnus laudes, & cùm à nobis
 alium audiunt commendari, pereonta-
 ri soleat, Regemne videmus? tum in
 manus sumpto radio hac Rupellam
 describunt, & ducto orbe concludunt,
 illac maria deriuant, isthac obiectam
 molem ædificant, ordine castra com-
 ponunt, aciem terra, marique instru-
 unt, Anglos procul ostendunt; ac de-
 mum te singulis locis miracula diui-
 dentem exprimunt. LVDOVICVS,
 inquit, idem in vallo, idem in agmi-
 ne, idem in classe, idem in aggere, idem
 locis omnibus adest, pugnat, trium-
 phat,

phat, quæ cum recitant attonito audito-
tore vallantur, quisque gaudet, vel ipsa
videre tuæ simulacra victoriæ.

QVID superest, nisi vt te superesse
velimus imperio LVDOVICI; addant vi-
tæ tuæ superi annos; quos Patriæ red-
didisti: dent LVDOVICO sempiter-
num Imperium, reddant sempiternum
Imperio LVDOVICVM; Viuat nobis;
viuat posteris, viuat omnibus; ferat vi-
tam, quam rebelles amiserunt; aut si
vobis debetur hæres aliquis tantæ vir-
tutis, det Rex optimus sobolem se-
optimo meliorem, ne quis vnquam suc-
cedat in regnum, qui non eius virtu-
ti successerit. Quicumq; deinceps ven-
turi sunt ad imperium Galliæ (ventu-
ri sunt autem, quos ex te Rex dede-
ris) meminerint qualis in Imperio fu-
eris: nec aliud quam Ludouici nomen
ferant, dum virtutibus impleant no-
men illud Augustum, quod virtuti con-
secrauit antiquitas, posteritas conse-
crabit

crabit æternitati. Toties placebit, quo-
 ties recitabitur nomen illud cum liliis,
 & palmis natum: nomen venerandū,
 semper antiquum, semper nouum.
 Nullus sit finis LVDOVICORVM.
 Iam quid à nobis exigis, INVICTISSIME
 PRINCEPS, qui tibi totum deberi intel-
 ligis, quod possumus? gratias referam?
 sed laudatoris munus suscepi; laudem?
 sed agenda sunt gratiæ; & quamuis
 feceris? quæ ab omnibus prædicari de-
 beant, effecisti tamen, ne quis ea præ-
 dicare posset, quia non minori virtu-
 te nostra præconia superasti, quam
 claustra rebellium. Utinam toties vi-
 ctor, saltem semel triumphares, O si
 mos ille vigeret adhuc, quo solemnī
 pompa victores portabantur in Urbē
 quantus foret Imperatoris nostri tri-
 umphus? quæ gentium acclamations?
 quæ monumenta victoriarum? Iret an-
 te currum depresso collo, subiectis cer-
 uicibus, subactō vultu condemnata re-
 bellio:

bellio: currum traherent simul victi cum Rupelensibus Angli, frontibus famulari iugo coniunctis; succederent agmina vitiorum vno simul omnia loco devincta, cæsaq; flagello virtutum! Hic tractus sonanti compede lior ringeret; fremeret audacia sine telo: iaceret arrogantia sine supercilio morderet invidia sine dente, debaccharetur impietas sine voce, hæresis sine viribus agmen clauderet. Qui plausus interea, quæ in laudes à circumfusus militibus conferrentur; Tu Benearnus, tu Cisalpinus, tu Transalpinus, tu Aquitanicus, tu Britannicus, tu Gallia dignior, tu Patre felicior, tu Henrico Magno; maior LVDOVICVS, festis vocibus dicereris. Splendidi præterea tituli laureati lennisci, sublimes imagines præferrentur. Ebores redderetur infœlix Rupella pretio maiori, quam merito; viuerent adhuc in adamante, quos in campo iugulasti, calatura, quam
vita;

vita nobiliores: Topaziis; & amethy-
 stis splendorem adderent virtutum;
 tuarum insculpta miracula: emeretur
 in auro sublime propugnaculum LV-
 DOVICUM: assurgerent iuxta in argen-
 to Aureliacense; Marillacense, cate-
 raq; tam nunc pretioso, quam antea
 presso molimine firmamenta: præirent
 de coniuratorum manibus extorta si-
 gna superbiæ: toties victi Bukkincamii
 simulacrum, ferream domito collo ca-
 tenam trahens, pedibus, manibusq; re-
 ninctis, splendidum fieret pompæ lu-
 dibrium. Nectare spumaret artefacto
 oceanus, vallo non iam cespitio, sed
 adamantino circumclusus, lapillorum
 obicibus ambrosii fluctus alliderentur,
 imbres gemmeos frangeret moles in-
 auro, crudito labore sudata. Alii deniq;
 LVDOVICO ponerent obeliscos,
 vt Cesostri: alii columnas erigerent, vt
 Traiano: tabulas illi figerent, vt Ale-
 xandro. arcus isti flecterent, vt Con-
 stanti-

stantino: Pyramides quidam excitarēt, ut Nino: quidam currus iungerent, ut Cæsaribus: plurimi statuas erigerent, ut victoribus innumeris. Sic LVDO-
VICE IVSTISSIME triumphares. Quamquam, ut fatear, hæc minora sunt meritis, neque vlla reperiri possunt emblemata, quibus tanta Maiestas exa-
quetur. Non obelisci in Metam efformari, Regis gloria metas nescit; non columnæ quæ deorsum basi nituntur, celo nomen illius innititur: non tabulæ quæ pigmentis collucent, virtus ista factis non coloribus illustratur? non arcus qui curvantur, atq; flectuntur, recta hic disciplina militis, inflexa constantia ducis; non Pyramidesquæ pūcto terminantur, LVDOVICI victoriæ terminos nullos agnoscent: non currus qui præter labuntur, non præteribit hoc factum: non statuæ demū quæ obmutescunt, tanta prodigia non silebunt. Triumphasti de ingenus ho-

D

minum,

minum, qui cū se impares rebus tuis
 omnibus exornandis agnoscant, in earū
 singulis singuli partibus occupabuntur.
 Neq; verò propterea vlla erit in iisdē
 factis enarrandis similitudo dictorum,
 sed in vna victoria omnes variè tri-
 umphabunt. Quia tantum vnus effe-
 citi, quantū vniuersi laudare possunt.
 Dicent alii pietatem illam spectabilem
 qua exercitui prælucebas; alii felici-
 tatem scribēt quā roties vincebas, quo-
 ties prodibas in aciem; alii prudenti-
 am in consiliis celebrabunt; alii forti-
 tudinem in factis extollent; multis cō-
 clusus, & subiugatus oceanus; multis
 merfus, & profligatus Anglus; omni-
 bus Rupellæ fames, & funes occurret.
 Iam quam copiosa dicendi vis ex fos-
 sis castrensibus eruetur? quam arduam
 suggerent illa propugnacula? quam su-
 blimem religio? quam longam obsidi-
 onis infracta constantia? quam magni-
 ficam tuus in Urbem ingressus? omnes
 postre

postremo mirari poterunt se dixisse, quod aliorum nullus attulerit, pauciora tamen ab vniuersis esse comprehensa, quam vnus fecerit LVDOVICVS. Tuum est æstimare, Rex præstantissime, cum tuis laudibus non sufficiant vninersi, num venia dignus videar, si de te paucissima dixerim. Fors erit (si quidem opera nostra placuerit) vt aliquando maiora audeam. Perge modo perduellionis reliquias insequi, perge butta illa Patriæ, nostris malis inflammata, nostris diu conseruata cineribus, aut dissipare consilio, aut cæde, sanguineq; restinguere. Compede desperatio, non gratia cohibetur. Et sane si multare pergis beneficiis perduelles, periculum est ne præmiis inuitati quamplurimi, addantur numero defertorum, pluresq; tandem hostes quam Ciues sis habiturus. Memineris te esse IYSTRVM iustitia pœnas, & præmia diuidit: nunc pœnam beneficio sustinet,

74 *Panegyricus Ludov: XIII:*
 nunc gratiam pœnis, suppliciiſq; com-
 mutat. Age, age, pauciora reſtant quàm
 feceris, & tamen nimis multa ſuper-
 ſunt: ægre virtutes, facilè vitia propa-
 gantur. O quando licebit dicere: om-
 ninò vicimus: Nullus rebellis tota
 Gallia ſuperest: nullum graſſatur bel-
 lum Ciuile: nullus inter nos viuít hæ-
 reticus. Licebit certe, licebit aliquan-
 do, licebit breui Hoc omnes opta-
 mus: Hoc Chriſtianus orbis ex-
 pectat. Hoc propitium nu-
 men continentibus, re-
 ſtatiffimiſq; mira-
 culis pollice-
 tur.



GENE-

GENETHLIACVS
DELPHINO.



Riumphate GALLI;
plaudite confœderati,
trepidate hostes, cedi-
te perduelles, fremitu
te barbari. VISITAVIT
DOMINVS ANNAM, ET
CONCEPIT, ET PEPERIT. Liceat enim
Oratori Christiano, quibus HEBRÆÆ
quondam ANNÆ post celeste puerperi-
um acclamatum est vocibus, iisdem
in communi omnium lætitia, argu-
mento non admodum dissimili, ANNÆ
quoq; AVSTRIACÆ felicissimo partui.
Non semper eadem coeli facies; iam
serenum nubilo conditur, mox tran-
quillo sædum mutatur. Post longa sæ-
pe sitientis terræ ieiunia, erumpit a-
quarum diluuium? & quæ modo raræ,
nunc densæ nubes largissimos imbres
D; effun-

effundunt; quibus arua imprægnantur
arentia. Annus iam tertius supra vi-
 gesimum agebatur, ex quo Christia-
 nissimo Regi sobolem coniunctis vo-
 cibus precabamur, sed ipsa vox cla-
 mando defecerat; iam exhausta erant
omnium vota, cum accisis deniq; re-
 bus, quasi profuisset ad extremum vi-
 rium deuenisse, vt ad fastigium gloriæ
 conscenderemus, nostra tandem desi-
 deria cumulatissimè DEVS expleuit, fe-
 citq; munificentia sua, ne nos, qui pau-
 lò ante nihil audebamus sperare, mo-
 dò quidquam ultra optare possimus.
 Illuxit enim aliquando dies illa tantò
 ante à superis destinata, fortunata re-
 gno, gràta Ciuibus, exteris splendida,
optata bonis, inuisa perfidis nulli cer-
 tè expectata, quæ regia nos prole
 donauit; ac proinde nemo non videt
 quantæ à nobis D^EO referendæ sint
 gratiæ, cum non minùs turpe sit bene-
 ficium auctorem dissimulare, quam ipsi-

us beneficii penitus obliuisci. Accedit
 præterea gaudii leges immensa; nam
 si quando plebeæ, vilique; familiæ noua
 proles adiicitur par est vnumquemq;
 lætari: statuite præcor, vbi non terræ
 filius aliquis de vulgo, sed augustus in-
 fans de regio sanguine, isque non post
 alterum, sed primus; nec paucis men-
 sibus, sed plurimis post matrimonium
 annis nascitur, quanta omnium animos
 lætitia incessere debeat. Cæteri quip-
 pe liberi nascendo fortiuntur humilē
 plerumque fortunam, vel certè medi-
 ocrem, in hunc terrarum Orbem quasi
 proiecti, ne vacuus relinquatur: tenui
 sub lare viuunt, parentibus additi ad
 laborem, à quibus denique non tam
 opum, quàm miseriarum relinquuntur
 hæredes Regum autem filii ipso ortu
 splendidissimi statim consecrantur Im-
 perio, vt postmodum fata hominum
 tractent inter quos sedent vt Patres,
 eminent vt soles, coluntur vt numina.

Atq;

Atque illud habet præterea Princeps Gallia singulare, quod ubi DELPHINUM suscipit, simul Ecclesie destinat PRIMOGENITUM FILIUM. Potentissimum fidei defensorem, firmissimum Evangelio columnen, orbi demum uniuerso Christianissimis illis Regibus unum, quos nescio plus gentes verè Catholicæ venerari soleant, quam auitæ religionis hostes, ubique pertimescant. Quæ si omnia scribenda persequi velim, quemadmodum nullis hoc beneficiorum terminis clauditur, ira finem nullum hæc oratio sit habitura: modus tamen adhibendus est aliquis, si minus gaudio, ac certè stylo, in quo sanè non labor exiguus. Quid enim mihi assumam ex tam ampla rerum silua? quid primum instituam? quid postremum? Dicam Ciuum acclamationes, & plausus? offerunt se mihi gemitus hostium. Galliam prædicem? Deus gratiam reposit. Finitimorum Principum gratulatio-

lationes, & officia referam? DELPHINVS noster mihi salutandus occurrit. Huius ego dignum Imperio vultum describam? quæritis audire, quæ passim de eo feruntur præfagia. Ita non habeo quid dicam, vbi tanta est dicendi materies. Quid? Duo certè, quæ hoc ex Natali præsertim effulgent, prætereire non debeo, scilicet regis domus gloriam, & Galliarum totius felicitatem, quæ breuiter hac oratione perstringam; de multis pauca, sed pro meis viribus multa. Præsertim cum vnus omnia complecti noluerim. ne subirem eorum inuidiam, quos in partem gloriosi laboris venturos esse confido: nec non mihi metuendum foret, ne cum ceteræ Galliarum Prouinciæ ad regis DELPHINI cunas officiosæ, & venerabundæ certatim accedunt, si longius morarer, serius mea se histeret Aquitania, & ad obsequium procederet extrema, quæ prima videtur imperio,

Magna fuit semper coniugibus cupiditas prolis, quod hæc nuptiarum messis est, & quasi flos thalami, socialis amoris fructus, parentum communis animus, pretiosæque reliquæ. Parentes quippe gaudent in liberis, veluti natio quodam in speculo, se ipsos intueri, & proprio arridere simulacro. Nam cum sit amans sui natura mortalium suam vt semper contempletur imaginem, sese effingit in altero. Quid quod successione sobolis, gentilium nomen propagatur in æuum, continuantur generis stemmata, vnoq; sanguine surgunt populi nepotum, in quibus quædam immortalitas seritur, vt quod natura, non concessit hominibus, diu viuere, id ipsi procreatione liberorum consequi videantur, per quos suum etiam ultra funus diutissimè, si minus toti certè parte sui quadam, æquè optima superstites manent. Viuunt ex parentibus filii, sed, & vicissim filii

lii Parentibus vitam restituunt, dum naturam, quam ab iis nascendo traxere, tradunt succedentibus seculis, & incorruptum maiorum nomen ad vltimas ætates longa prolis seriè transferunt. Accedit robur, & firmamentum familiæ, quæ vt arbor luxuriosa radicum propagine, sic numerosæ, pulchræque sobolis præsidio niritur. Quantus enim ex nobili filiorum corona paternæ gloriæ splendor additur? quanta etiam reuerentia accersitur? quia non modò conspectu suaues, colloquio, officiiisque iucundi sunt, sed hoc vel maximè Parentibus vtilis filii, quod eorum amore nihil fortius, nihil fidelitate robustius. Timetur quisquis posteros relinquit nominis vindices, & potestatis assertores: omnium patet iniuriis, qui nullum hebet hæredem dignitatis, & famæ. Quare solemne fuit cunctis propemodum gentibus, vbi proles deficeret, naturam arte fulcire,

& pe-

& peregrinos successores accersere, ut
 ruentis familiæ casum ingenioso sup-
 plemento vitarent. Propterea Osirim
 Dionysius in Ægypto, Pandides Ægæ-
 um, & Theseum Ægæus in Græcia,
 Adamas in Caria Alexandrum, Hilde-
 ricum in Gallia Sigebertus, Aurelius in
 Hispania: Veremundum, Luithprandus
 in Insubria Carolum: Theodoricus in
 Italia Herulorum Regem in filium
 adoptauit. Neque Romani hoc loco præ-
 tereundi, quibus pluresne liberi fue-
 rint asciti, quàm geniti iure dubitet,
 qui legerit hac arte Tiberium Augu-
 sto, Claudio Neronem, Pisonem Gal-
 bæ accessisse, familiis insertas, plerasque
 familias Octavianam Iuliam, Æmiliam
 Africanam: & Neræ Traianum,
 & Traiano Adrianum, & Antoninum
 Adriano, & infinitos demum alios ab
 aliis adoptione quæsitos. Nempe ma-
 iores nostri hoc suæ arbitari remediū
 afferendum putarunt, ut si liberos na-

cura negaret, solertia pareret, ac intel-
 ligeret vnusquisque, quo proprii loco
 filii debebant haberi postquam tanti
 fuerint, vel alieni. Sed quid profanis
 vtimur, qui diuinis abundantus? Gen-
 tibus olim numini mancipatis summi
 beneficii loco promittebatur *longævum*
seu sen, & fœcunda progenies: iis verò,
 quæ in scelera prorussêt, Deus ad sum-
 mum dedecus iuxta, & acerbissimam
 pœnam, *sine liberis vultam,* & *vbera* in-
 terminabatur *arentia;* adeo vt male-
 dicto quodam afflatus, & veluti de
 cælo tactus videretur, quisquis priscis
 illis temporibus careret ornamento, ac
 solatio liberorum, & quanto matres
 suos tunc partus gloriosius numera-
 bant, iactantes prægnantis uteri pom-
 pam, tanto sterciles fœminæ ferebant
 acerbius infamiam solitudinis, & are-
 scentium viscerum probra. Incede-
 bant mæstæ, demisso vultu, veste lugu-
 bri, sine nomine, quia sine sobole or-
 bi

bi pœne inuisæ, quod orbi haberentur ingrata. Aliæ suam sortem in syluis miserabiliter lamentari: aliæ cælum precibus vrgere, & quâ votis, quâ sacrificiis prolem quærere; aliæ fetus alienos sibi etiam subrogare, & ancillarum puerperio suæ sterilitatis labes implere: Tantus omnibus amor, & desiderium prolis.

Iam intelligis, Rex Augustissime, iam Regina sapientissima vides, quantum Maiestati vestræ decus accesserit, ex quo vobis nobilem filium, cõmunem parentem nobis, Galliæ Augustum olim Regem procreastis. Auxit vos tandem hoc Deus munere, quo nullum manus, hoc quidem rerum statu, aut ipse concedere vobis, aut vos ab ipso contendere poteratis. Fuerit is magnus dolor tamdiu caruisse fructu connubii; abunde sanè diuturnam mœstitiem Deus hoc pignore compensavit, quod simul vester nobilitatus est

thalamus, simul expletum desiderium,
 simul firmatum imperium, o gratiam
 singularem! o beata tempora! o non
 expectata miracula! Meminimus, quæ
 regium animum tristitia premeret, cū
 sibi suscipiendæ prolis spes nulla foret
 post tam longa annorum steriliū spa-
 tia. Et verò non poterat Rex optimus,
 non vehementer dolere, cum recogi-
 taret, Regum tota Europa nemini,
 præterquam sibi deesse filium, & au-
 lam hæredum vacuum oculis iustran-
 do, Principum identidem cæterorum
 natales acciperet. Quis tibi tum ani-
 mus, LVDOVICE? tum sensus orbitatis
 domestice? quis præterea navis fortunæ
 Magna feceras, hucusq;? Princeps In-
 victissime. imò omni prorsus fide ma-
 iora; sed quo celsius tua te virtus ere-
 xerat, eo naturæ iniuria videbatur a-
 trocior, quæ summo Regi inuidebat,
 quod ipsi passim plebi concedit. Tol-
 lebaris, tua ut solitudo altiùs emine-
 ret,

ret, & qui longe, latèque fines amplificabas imperii, mirum erat domum te augere non posse. Iam Maiestatis tuae numen ubiq; diffuderat iam bella Ciuilia ineluctabili pace mutaue-
ras, iam crexeras focios, & raptorum foederum vulnera ferro sanaueras, iam virulentam hæreseos saniem deterse-
ras, & rebellionis arcem euerteras, iam ad Rupellam hostibus, procellisq; superior altis maris voragines fatali mole compleueras, iam non minùs for-
ris, quàm domi victor continuatis lau-
reis, prærupra Alpium iuga transmise-
ras. Immortalia sanè facta, nobilesque victoria; sed operosius aliquid tibi mol-
liendum restabat: efficere tui similem.
Ita in tanto rerum apparatu hoc mi-
nùs felix videbaris, quia solus; neque enim satis erat tibi vis opum immen-
sa, non classium robur, & exercituum numeras, non Imperii florentissi-
mi gloria, non amor tuorum, non so-
cietate;

cietates exterorum: non cumuli triumphorum, quamdiu desiderabatur filius, qui vultus patris referret, hæres qui tantæ pondus gloriæ sustineret. Quidquid magnificè fortuna tribuisset, putabas exiguum, quod felicitati tuæ suum nondum addidisset natura suffragium. Audiebas tu quidem passim Inuictus exteris, Iustus subditis, omnibus Triumphator. Alii te rerum restauratorem, alii Dõnitorem hominũ, alii immensi Regnatorem Oceani, alii Galliæ Numen alterum, Propugnatorem Italiæ, Britannia Fulmen, Iberiæ, Germaniæque Terrorem, Europæ totius Arbitrum appellabant; Patrem verò hæcenus vocare nemo potuerat, nisi quando Pater Patriæ dicebaris; dulce adhuc aberat Parentis nomen; quo indigebas vno, qui tam multis abundabas.

Parte alia Reginam, qua non melior altera, videbamus pari mœnore

con-

confectam, Diuis, hominibusq; suppli-
cem, humi prostratam, nunc Deo dica-
tas ædes pedibus adeuntem, nunc in-
vulgi turba demissè sacra mysteria v-
surpantem, nunc clam subeuntem cœ-
nobis virginum, & religiosa captantē
silentia, quæ calum suis aliquando pre-
cibus vinceret, & inde stirpi regiæ sur-
calum duceret, vnde sciret antiquum
Miorum candorem Galliæ Regibus de-
fluxisse. Nam tametsi infinitis gloriæ
titulis coruscabat, & magni Regis fi-
lia, maioris soror, maximi coniux, cæ-
terorum denique Regum vel consan-
guinea, vel affinis, omnia ferè Euro-
pæ diademata suo sanguini auita co-
gnatione sciret esse coniuncta: quoni-
am tamen nondum Regis mater, in-
tanta vbertate sceptrorum, orbitatem
domesticam deplorabat. In mæstam so-
litudinem frequens aula transierat, de-
clinabat ipsa populi conspectum à quo
sibi Regem postulari sentiebat, inge-
misc-

miscbat, se non parere Principem
tot Principibus ortam, & quæ magni
nominis famam superauerat maiorum
exemplo virtutum, viuum sui exem-
plum posteris non posse relinquere.
Sed hunc denique mœrorem excepit
gaudium, postquam Regi filium pepe-
rit. Ô Galliam tibi ANNA, vel hoc no-
mine immortalis nexu deuictam, quod
eam DELPHINI natalibus fecisti regnis
omnibus clariorem! Ô supra modum
illustrem Reginam, ex quo nostro de-
disti nouum sidus Imperio!

Sî quis Superioribus annis huius
prolis augur, & prænuncius accessis-
set, quos ille risus excitasset in plebe?
quos in sermones incidisset, qui rem
omnino desperatam vaticinando pro-
mitteret? Res enim erat huiusmodi,
vix vt eam quisquam optare, nedum
expectare auderet. Scilicet cum id ma-
ximè nostræ omnium preces, supplica-
tionesq; ad hanc diem incubuissent,
ceci-

ceciderant tamen hucusque irritæ, &
 incredibile videbatur, quod tot annos
 frustra petieramus, Deum in hæc tem-
 pora reseruasse. Votis ardentibus suc-
 cesserat triste silentium, & longis fes-
 si clamoribus, cælum quod ad nostras
 preces pridem obsurduisse credebatur,
 erubescbamus adire: quin ipsi, quod
 sperare verebamus, metuebamus eti-
 am loqui. Memini enim, ante annos
 septem, cum Burdigalæ esses, REGINA
 AVGVSTISSIMA, & illustris Doctorum
 Academiæ, tui salutandi causa, ex of-
 ficio conuenisset, vetitum fuisse orato-
 ri, ad dicendum parato, ne quam
 de DELPHINO vocem mitteret, cuius
 tum adeo nulla spes erat, tibi, vt non
 tam benè precari, quàm illudere vi-
 deretur, quisquis intempestiuam illius
 faceret mentionem. Anno verò pro-
 ximè elapso, cum primum te gravidam
 rumor vulgasset, qui sermones vltro,
 citroq; sunt habitæ quæ plebis conie-
 cturæ

Etura fuerunt? quæ Ciuum iudicia?
qui sensus exterorum? Illi dicere spar-
sam de industria fabulam ad explo-
randa vulgi ingenia; illi suspicari hanc
inter belli molestias nobis fingi ma-
teriam gaudii; illi ridere in sinu, etiam
in angulis cauillari; nemo fidem adhi-
bere prodigio. Vt enim, quod quisq;
timet, citò credit ita ægrè sibi persua-
det accidisse, quod vehementissime cu-
pit. Et ecce vicit diffidèciam nostram
diuina largitio; desiderium beneficii
magnitudo; expectationem omnium
tua, nostraq; felicitas. Didicimus fieri
potuisse, quod factum est; & te iam
nostram, ANNA, fatemur esse, post-
quam nobis diceris mater, Mater ve-
rè Magna, quæ Reges paris. Gallia ve-
rè Regina, quam amplificas. O quan-
ta es modo, quæ paucis ante mensib;
de te tam modicè sentiebas! quantū
emines, quæ latebas! imò qualis, quan-
tusque tuus idem, & noster, per te

LVDOVICVS occurreret omnium oculis?
 quàm charus subdiris? quàm formida-
 bilis hostibus? Quid enim Rex suo-
 ingenio generosissimus non perficiat
 illo Heroe subnixus? Quid vicissim
 Heros filius hoc Patre non audeat? E-
 rit aliquis, qui Galliam, vel non ex-
 optet amicam, vel non pertimescat ad-
 uersam? & cum vni pridem nostro pa-
 reant omnia Principi, quidquam ali-
 quando coniuncto Principum duorum
 obsistat Imperio? Ibit venerabilis, &
 altero tantò maior, qui semper maxi-
 mus fuit; tuumque, Regina, fatebitur
 esse, quod creuit; nos vtriq; vestrum
 quod adeo sumus felices, referemus
 acceptum, illamque diem claro nota-
 bimus calculo, qua nostro in Orbe sur-
 rexit ille Parelius. O nonas Septem-
 bres nobis aeterna memoria retinen-
 das! Obseruarunt quidem alii religio-
 sè summorum virorum natales; diem
 illam Persæ perpetuo sacram habue-
 runt,

runt, qua Xerxes accessit Imperio, e-
am Syracusani semper coluerunt, quæ
Timoleonem, eam Athenienses, quæ
Socratem peperit: Romanis quoq; di-
es illa quot annis solemnis fuit, qua
Vrbis fundamenta iaci cœperunt; nec
non Idus Iuliæ Iulii Cæsaris ortu insi-
gnes, Kalendæ Ianuariæ Titi. Decem-
bres Neruæ, Nouembres Adriani, A-
priles Antonini, Februariæ Constan-
tini. claræ natalibus olim. Romæ ma-
gna cum pompa celebrari consueue-
runt. Nobis verò semper illa dies di-
cetur supra cæteras omnes beata, quæ
regio præluxit DELPHINI partui: illa
nobis in anni circumflexu redibit gra-
tissima omnium, quem utinam place-
ret in posterum dici Delphiniam, ut
in Asia quondam festam quamque di-
em à Mutio libertatis vindice, Muti-
am nuncupatam legimus; illamque
Cyrus lucem, qua Sacas memorabili
strage deleuit, Sacam de ipsorum no-
mine

mine voluit appellari. Quamquam hæc adhuc exigua, illi nos dici meliora precemur, quæ nobis diffulsit optima. Luceat illa Sole perpetuo, quin etiam nouis fulgoribus augeatur; immortalibus fastis emineat, & Orbi Christiano recurrat semper augusta.

Ac certa quemadmodum iuenditor nulla nobis illucescere potuit, ita nulla quoad recordari possumus, maiorem Galliæ lætitiâ attulit. Quis non risit cum auctum filio Lvdovicû accepit? quis non oculos sustulit, cum is nuncius ad aures peruenit? sed quantæ vbique extiterunt signa lætitiæ? Exaudiebantur passim confusæ tubarû clangoribus Civium acclamationes, festis undique pyris lucebant compita, ludis theatra perlonabant ingeniosis, cœlum corruscabat missilibus ignium iocis, tellus mugiebat reperitis tragoribus tomentorum, sibi quisque demum gratulabatur illam diem, Deo

miraculum referebat. Quid dicam redimiras emblematicis statuas, & pyramides sulphureis iaculis fulgurantes? Quid suspensos artificiofis nubibus soles, & pluiias vini iucundas? quid dies noctibus continuatos, & noctes accensis funalibus perturbatas? Hic florum congelatæ messes, illic extructæ dapibus turres; Hic tripudiantium chori, illic conuiuantium globi: nec satis erat vinum capacibus haurire poculis, nisi solutis, etiam dohis fundetur. Parum videbatur erogare pecuniam, spargebatur in vulgus: adeo quisque rerum suarum obliuiscatur, cum Delphini meminerat. Quæ satis ego mirari non possum, cum mihi redit in mentem, qui nuper erat vultus Gallorum: enim verò deformes non ita pridem, & squalidi videbamus, quia ioris bella sauebant atrociam, domi vrgebant occulta mala. Iam plebeculam demessuerat dira fames, & ecce

E

non

non longè post, lues summis æquè ac infimis metuenda superuenit: lues remiserat, bellum successit, quo nullum ante funestius, itaque nobis vita traheretur, multiplici ac tortuosa negotiorum ambage. Sed hunc vultum cum fortuna mutauimus, metus omnis abscessit, postquam DELPHINVM aspeximus, qui sedabit procellam temporis, otia reducet antiqua, populos faciet inconeussa pace concordēs.

Ac enim liceat mihi à priuatis regiae domus honoribus orationem deducere ad commune Galliae bonum, & post aulae delicias, nostram quoque fortunam diligentius contemplari. Qualem tandem futurum arbitramur hunc puerum, quem DEVS extra ordine nobis concessit, LVDOVICVS XIII. perfecta iam ætate genuit, ANNA AVSTRIACA post ardentissima vota concepit? Mos fuit antiquus nascentium Principum partus curiosius inspicere, & ex
nata;

natalibus conicere, quid cuique fata
 seruant. Quam quidem diuinationē,
 nonnulli ex siderum obseruatione du-
 cebant, vti fertur Tiberius Augustus
 Imperium prædixisse Caligulæ: non-
 nulli arripiebant ex somniis, vti Cyri
 gloriam ex eo coniecisse narratur A-
 styages, quod eius mater sibi dormi-
 enti visa esset ex se palmitem funde-
 re, quo tota latè Asia regeretur; nec
 non Philippo præcognita dicitur Ale-
 xandri virtus, quod sibi in somnis leo-
 ne foeta occurrisset Olympias. Idipsū
 alii se colligere posse putarunt, subito
 rerum euentus interpretando, quem
 admodum Augustus dextri fulminis
 iactu destinatus perhibetur Imperio:
 alii ex notis quibusdam à natura im-
 pressis vaticinando, quomodo Scan-
 derbeko Principi tot hostium victori
 ea figura gladii, quam toto eius bra-
 chio natura longè descripserat, inuictæ
 fortitudinis prælagium fuit: alii ex ver-

bis ipsis argumentando, quæ a se primò frangere solent infantes; ita quod Rex Pyrrhus maternis adhuc appensus vberibus gestiendo, ΒΟΥΔΟΜΑΙ primùm dixisset, ea statim vox transit in omen audaciæ. Quid consulta dicam oracula? quid ab orco quæsitæ mēdaciæ? quid caprata ab auibus auguria, & adhibita tempestarum, dierum, horarum examina? partusne contrigisset amœno verè, an rigida hyeme? Kalendaris, an Idibus? die Ioui sacra, vel Palladi? Infinitæ olim diuinandi artes, sed totidem quoq; fallendi: plurimæ fati coniecturæ, sed incertæ omnes, & vanæ.

Quare valeant dubia astrologiæ iudicia: valeat Hetrusca veterum disciplina: nobis nec cottiones, declinationesue siderum astrolabio colligendæ, nec lituo describendæ cœli plagæ, nec euocanda carmine manuum spectra, nec adseundus Apollo; vel consulendus

dus haruspex ad auguranda DELPHINI
 nostri miracula. Prodit se satis illa
 Maiestas suorum splendore natalium,
 nec celsam illius indolem metiri de-
 bemus peregrinis omnibus; quia nefas
 est caeleste fatum scrutari superstitio.
 ne mortali, & quod Numen ipsum
 comprobavit, reuocare ad sortem.
 Quis enim dubitet augustam hanc Pro-
 lem diuinitus esse concessam, cuius
 causa toties immortalis Deo solemniter
 supplicatum est? toties litatum? quas
 non opes in mendicos effusas, quas non
 preces in caelum emissas, quibus non
 templa donis, quibus non sacrificiis al-
 taria cumulata cognouimus, paternis,
 ut Rex aliquando, frueretur honoribus?
 Nemo nostrum non saepe vocauit ven-
 turam prolem, nemo non genua fle-
 xit, & supplex adiit superos, ut nostrae
 tandem orbitati consultum vellent,
 quia haec summa votorum, vnum o-
 mnium desiderium, Galliae nasci DEL-

PHINVM. Quo si gaudemus demũ, gaudemus profectò Dei munere; à quo cum nihil fluat, quod non omninò sit absolutum, an non ab eo Principe tantũ sperare oportet, quantum à propicio numine tribui consuevit? Atque nos idcirco DEVS huc usque protraxit; hæc molestæ sustentationis origo,

Inquirebamus nuper quamobrem post tam longam à liberis solitudinẽ. is denique Regi obuenisset; Atque illi quidem causabantur magnitudinem operis, & longas rerum ingentium moras, nihil perfectum existere subito vulgus hominum citò nasci, quasi nullius momenti; Reges ad mundi gubernacula comparatos, in lucem difficultè erumpere, & longa fingi meditatione naturæ. Illi morem numinis afferebant, quod sua quidem beneficia, prolatando commendat, nos verò dissimulando exercet; ita fidem probari nostram, erudiri constantiam, nec non
quæ

quæ seriùs, ac difficiliùs obtinentur, diligentiùs conseruari. Nonnulli secus interpretantes præclarè factum arbitrabantur; ne quàm ardentè à nobis regia proles ab ipso statim Regis connubio efflagitabatur, tam celeriter prodiret, quod LVDOVICVS noster tum admodum iuuenis, si filium suscepisset, breui regni socium habiturus fuisset, nec orbis duobus sufficere potuisset, qui vni pene videretur angustus. Nonnulli vertebant se ad arcana naturæ, quæ se ipsam interdum excusso torpore vegetat post otium actuosior, cù ipsa mutetur corporis habitudo, & ætas succedat ætati; hic enim aliquando seges est, vbi fuerat solitudo. Alias demum alii insperati memorabant causas euentus; mihi tamen sic semper animo persuasum tam diu negatam optimo Regi sobolem, vt cùm eius obtinendæ spes omnis corruisset, certò liqueret, quis tanti beneficii auctor esset

set habendus, ipsique fateremur hunc puerum non tam ententis naturæ labore, quam indulgentis dono providentiæ genitum. Quod intellexisse te, Rex Præstantissime, satis indicasti, cum recens editum regis manibus excepisse diceris, non ut primis indulgeres amplexibus, & paternum nomen osculis initiares, sed ut creditorem agnosceres, & cælo delapsum pignus numini consecrares. Nec multo post audiimus Reginam (cuius quoties nomen incidit, offert se mihi statim diuina quædam pietatis effigies) hoc prædulci onustam pondere processisse ad aram, & inter solemnia sacra flexis genibus, religione singulari, sanctis perfusam lacrymis Deo partus sui dicasse delicias. ne cui liceat in posterum dubitare, quin acceptum sit à numine, quod ab utroque parente videmus numini redditum.

Quippe neuter ignorabat Deo semper

per

per placuisse primitias, quas prophana etiam antiquitas vanis Deorum simulacris offerendas putavit. Nam & Sabinos veteres accepimus Deo Termino pubescentium segatum comportasse manipulos, & Ithidi recentium vuarum sanguinem libasse Sacerdotes Hetruscos; Græci præterea Vestæ frugum principia, Romani Ioui Feretrio noua offerebant hostium spolia: quin matronis solenne fuit prima muliebris mundi firmata de templorum tholis suspendere, nec Theseum puduit Apollini Delphico comæ nascentis exordia consecrare. Superstitiosa isthæc, & vana, ut tum terebant tempora. Vos, Parentes optimi, quibus augusta de cœlo mens, antiqua pietas, vera religio, vero, æternoque Numini obtulistis puriores primitias thalami, nec aliena deditis, sed vestra proprium scilicet sanguinem, communem vitam, ipsa denique viscera. In quo quid impensius

admirari nos decet, tuam **LVDOVICE**
 fidem, an tuam **ANNA**, pietatem?
 doni magnitudinem; an dandi modū?
 Magnum est quod dedistis; sed effun-
 debat se vester animus ad maiora, &
 largiendi voluntate, quam facultate
 ditiores, regium donum, quo nihil po-
 rius habuistis, prosequuti estis lacry-
 mis, auxistis affectibus. Sed hæc **DEO**
 secreta patuerunt, nobis non licet tam
 altos scrutari sensus, satis est, quem vos
 ipsi tacitè deuuebatis, vidisse aris ob-
 blatum, & suspensum manibus, quem
 corde gerebatis infixum. O solium
DELPHINO dignum! O dignum altaribus
 ferculum! Suos quondam **Principes**,
 cum nascebantur, **Scythæ** clypeo
 extulerint, ad belli præludium, suos
Athenienses Sacerdotalibus infulis te-
 xerint, ad pacis auspiciū; **Persæ** ad-
 uerso **Soli** opposuerint, ad religionis
 specimen; **Romani** humi strauerint, ad
 miseriarum exemplum; **Turcæ** milita-

ri vexillo, ad iactantiam; Græci purpurea chlamide, ad pompam, Parthi callide, ad ferociam exceperint: Delphinus aris erat imponendus, ad æternum pietatis regis monumentum.

Sed quò mea sensim se subduxit oratio? mihi de nostra omnium felicitate dicere meditati, noua semper occurrunt miracula. Quæro tandem, in quem virum sit euasurus Princeps his natus auspiciis, his cærimoniis inauguratus? Ingentia sunt, non humilia Dei dona, minora quidem opibus suis, semper tamen meritis hominum celsiora; ac proinde munifico numini facit iniuriam, quisquis ab eo, putat aliquid concedi mediocre. Memores estote Galli, quantum acceperitis victorẽ in Philippo Augusto; quale iudus in Diuo Ludouico, quos Parentũ preces nostro quondam imperio pepererunt: Prædicare Ægyptii, qualem videritis in Iosepho moderatorẽ, quem DEVS effata

effatæ Patris senectuti concesserat:
 Dicite Hungari, qualem habueritis Re-
 gem in Stephano, cuius natalibus præ-
 luxit cœleste prodigium Reterte Hæ-
 bret qualem susceperitis in Isaaco Pa-
 trem, in Samuele Iudicem, in Ioanne
 Solem, quos sterili prognatos toro v-
 niuersus Orbis suspexit. Nihil est a Cæ-
 lo commune, à quo, qui nobis DELPHI-
 NUS exiit, non potest non esse Magnus.
 Quamquam hæc si abesset diuina suf-
 fragia, sufficerent puero exempla do-
 mestica, cum sanguinis ille degener esse
 non possit, nec à Rege Christianissi-
 mo Religiosissimaq, Regina quisquam
 edi non optimus. Ut fructus arborum
 naturam sequuntur, sic ferè liberi Pa-
 rentum mores imitari solent, & non
 vultum tantum, sed indolem quoque
 ferre simillimam. Iam ex utraq; stir-
 pe quanta DELPHINO sese offerunt in-
 citamenta virtutis? Nolim a me quid-
 quam hoc loco per assentationem di-
 ctum.

Etum, quia nec virtus calamistro, nec
cothurno veritas indiget, verum ut
hæc mendacio crescere non potest, ita
non debet premi silentio. Eo sub Re-
ge nos vivimus, cuius non modo quis-
que optet imperio subici, sed ut subii-
ciatur etiam contendere debeat: ni-
mirum illius vita si æquius æstimeretur,
censenda est magna quædam virtutū
thesis, & veluti collegium miraculo-
rum. Si dixerobonitate incredibili, al-
tissima prudentia, æquabilitate perpe-
tua, eximia pietate, summa fortitudi-
ne præditum, minus, quàm debeam,
prædicem; quia quæ reliquis Principi-
bus laudi singula tribuuntur, in nostro
vno mirabiliter cœunt vniuersa. Quæ
non suo statim vultu recreat, si com-
paret? quem non demeretur, si digna-
tur alloquio? Pascit intuentium ocu-
los, & licet magno iam nomine to-
tum latè orbem impleuerit, tamen
contra quàm cæteris accidit, maior
semper

semper conspicitur, quam soleat prædicari: adeò ut qui Regem nunquam viderint, summo eius videndi desiderio teneantur; maiori metu amittendi, qui vident: abripitur, ad eum quisquis accedit, & quæ est diuinarum rerum natura, ita sibi omnes affixos tenet, nemo ut ab eo non recedat inuitus quisquam vix auelli possit. Quamquam illa Maiestas etiam absens coli solet, quos enim sua non præsentia reficit, rerum gestarum fama percellit: etiam iniquissimos quosq; suæ gloriæ obtrectatores ita perstringit, ut incertum sit, plusne diligatur à subditis, an prædicetur ab hostibus.

Quid ergo iam Reginae virtutes dicendo commemorem? quas sanè multas, maximasq; esse oportet, postquam Rex tantus eas suspexit, omnes tacito quodam instinctu palam efferunt, In ea quippe non modò acre viget ingenium, sed tam casti præterea mores
clu-

elucet, tam egregia fides, tam solida pietas, tam insignis mansuetudo, ut cum dignitatem summæ fortunæ retineat, nihil supra communem sortem assurgat, eaque sit omnium vox, si quis Reginam in media turba aulicorum internoscere velit, facile cogniturum, dum obseruet modestissimam omnium. Cultu simplex omnem longè ornatum superat, semper animo tranquilla, nescit aulæ strepitum, omnibus denique virtutibus cumulata, facit, ne nos Clothildes, Blancas, Radegundes, Eleonoras, Elizabethas, Margarethas, Catharinas maioribus nostris inuideamus, postquam tenemus ANNAM, quæ paucas sibi Reginas vidit æquales, nullam habuit gloriâ superiorem. Equidem quoties Regem, vel Reginam intueor, existimo videre me, spirantem honestatem, radiantem sapientiam, arridentem humanitatem, sedentem constantiam, liberalitatem
erum.

erumpentem, imperantem iustitiam, religionem triumphantem, quæ in vitro maiora sint, difficilè est comparando iudicare: in utroque profecto sunt tanta, quanta summis Principibus optari possunt.

Quare vestrum est Galli ex ea semente messem æstimare, quam collegistis; magna siquidem vis est in genere, propterea quod communione naturæ, non modò Parentum sanguis deriuatur in venas succedentium liberorum, sed ipsa eorundem virtus in mentem quoque transfunditur; adeoque si quantæ sunt in utroque Parente tum ingenii, tum virtutis dotes, tantas postmodum in regio DELPHINO visuri sumus (quod par est vnum quemque nostrum sperare) quis omnibus retro seculis Princeps maior, meliorque surrexit? Si Patris vigilantiam obtinet, quis solertior? si Matris dignitatem, quis spectabilior, dum illius clementiam

refe-

referet, quem non vincet officiis? dum huius modestiam imitabitur, cui non occurret augustus? Accedat ad Regis fortitudinem, cuncta suo adiunget imperio succedat Reginae pietati, nullum non rapiet virtutis exemplo: *Æquet* *LUDOVICI* iustitiam, quid non illo Legislatore moderatum? Excipiat *ANNÆ* sapientiam, quid non illo Rege perfectum? utriusque demum retineat modum, videbimus gravitatem urbanitatem, modestia principatum, maiestatem popularitate conditam: & quidquid habet Gallia nobilitatis, & gloriæ, quidquid Hispania amplitudinis, & famæ, in hoc vno collectum ad Mundi dominium.

Atq; hunc vigorem; hoc imperium toto iam illius vultu eminere audio (neque enim fas omnibus eò testes afferre oculos) Regem spirare dicitur adhuc infans, iam affusus genis lepos, & dignitas, quæ Principum esse solet;

solet; iam fronti decus impressum, eu-
iusmodi Herodém decet; iam fulgor in-
ditus oculis, qui sydereum, & cœle-
ste aliquid sapit. Cernitur vterq, pa-
rens vnus in ore; excelsum caput at-
tolit, quasi toto, vel in cunis iacens;
regno emineat; figit obrutus imper-
territos, quasi gentes iam nutu terre-
at, suo breui ferro domandas, manus
explicit audaces, quasi sceptris apta-
re velit; teneriter firma exercet bra-
chia, quasi præludat hostium fatis. Ec-
quem verò metum circumiectis hinc
inde nationibus barbaris incussum fu-
isse putamus, vbi primum de DELPHI-
no audiuere? An non ipsis visi sunt
prisca illi Gallorum Reges, tot genti-
um superbi victoriis, quorum imperio
vniuersus ferè terrarum orbis succu-
buit, hoc infante renasci? O Galliam
hac imprimis prole felicem! Nunc
longas tibi, Regina, partus moras igno-
scimus, quas tam glorioso scœnore re-
para-

parasti: iam intelligimus non nimis diu expectatum fuisse, qui tantus futurus erat; quin eo gratior accessit, quò serior: eumque tu, Mater Augusta, tardiùs emittere debuisti, vt ex sanguine iam maturo coalesceret fortior. Siquidem ad concipiendum difficilis, lenta etiàm partu fuisti; & cum ad annos tres, & viginti fœtum suscipere distuleris, in decimum præterea mensem gestasti vtero; tum quia Principes non eadem, qua cæteri, celeritate funduntur, & qui Rege prægnans est vterus, ægrè patitur tam superbo se onere liberari; tum quia operosum est, quidquid excellit: & longo spatio cuditur, quod æternitati sacratur. Sic uniones videmus avaro cælo singulos sudari lentè; sic elephantum toto biennio vterum ferre, & fœtum moliri, sic leonem post longos naturæ conatus vnum edi partu generoso, se raro.

Hoc

Hoc vnum ad felicitatem Galliae sempiternam optandum restat, vt eum ad multos annos superstitem videamus, quem, vt liceret aliquando conspiceret, diu, multumque contendimus; & longius tantò viuat DELPHINVS, quanto cœpit viuere serius. Quod ipsum etsi futurum semper speraui, maximè ex quo dubitat nemo, quin hunc Regi filium DEVS singulari quodam munere concesserit: tamen auget multo etiam magis spem meam eximia Regis pietas, qui eundem vix dū alio materna conceptū, Virgini Deiparæ, vna cum amplissimo regno, solemni ritu consecrauit. Hic enim, LVDOVICI, præterire non possum insigne illud religionis tuæ monumentum, quod, dum hominum genus erit, nulla non secula prædicabunt. Iam tibi desideratæ prolis spes non inanis affulserat, iam pretioso fœtu Regina distēdi cœperat, cum tu miraculi intelli-

gens,

gens, vt beneficium, quid pietate merueras, pietate rependeres, idq; cum fœnore non modò pignus acceptum, sed & præterea vniuersum, quàm latè parer, Galliarum imperium, Augustissimæ Dominæ, nexu perpetuo deuouisti, ne quos haberes in subditis, quos illa sui nesciret esse mancipii. Imò verò iussisti nos tuæ deuotionis esse consortes, & tecum ad pedes Magnæ mundi Imperatricis accidere, vt gratiam, quæ pertinebat ad omnes, singuli agnosceremus, & tum Regni dedicatio perfecta haberetur, cùm eam quisque voluntario firmasset obsequio. Et si enim tu, qui omnium in te fortunas colligis, vnus spondere poteras pro omnibus, & Rex magnus personam implere humilium famulorum; tamen, ne cogi videremur ad seruiturè, dum nos inaugurabas ad sanctitatem; decuit, vt ipsi tuum non minus spontè imitaremur exemplum, quam facile seque-

sequeremur imperium. Quale fuit illud spectaculum, quamque iucundum? cùm se infinita toto regno vis hominum, ordines vniuersi, catus, societates, collegia, municipia, castra, Vrbes, Prouinciæ, ad Almæ Virginis aras, iplo die, quo Assumptæ in cælum triumphus agitur, effuderunt: Atq; hinc Rex suo maior imperio, inde Regina foetu grauior magnifico, in genua procubuerunt, vt simul omnes Galliam potenti cælorum Regina: simul venturam prolem Augustæ Dei Matri, vno consensu vouerent. O magnum præsidium gloriæ! O benè, ac feliciter auspicatam DELPHINI sortem! Sic regius infans nondum terris monstratus, cælo militare didicit; prius initiatus, quàm eductus; ante superis additus, quàm nobis editus; Sponsors iidem fuerunt, qui Parentes; regni obles idè, qui hæres. Ecquid hoc infante beatus, quem citius Virginis manus exceperet,

pere; quàm obstetricis? quid MARIA
 nutrice securiùs, cui se DEVS ipse re-
 gendum dedit? Hæc imperium DEL-
 PHINO, hæc DELPHINVM seruabit im-
 perio. Quod si nostra adhuc exaudi-
 untur omnium vota, nemo certè illo
 feliciùs regnauit, nemo diutiùs vixit.
 Ille sibi gentes, quas bellicus furor to-
 to orbe diuisit, conciliabit vniuersas:
 ille subditis, quos habebit innumeros,
 omnibus superstes erit: ille cum Leo-
 nibus Leopardos, cum Liliis Aquilas
 immortalis pace componet: ille barba-
 ram gentem Othomannorum, & no-
 cturnum crescentis lunæ fulgorem
 extinguet; ille ad vtriusque maris re-
 motissima littora, ad orientem iuxta,
 & occiduum solem suæ maiestatis nu-
 men diffundet: ille victoriis Orbem
 terrarum peragrabit, Clodouæis illu-
 strior, Pipinis fortior, Carolis felicior,
 Philippis augustior, Henricis maior,
 Ludonicis (si quid eorum addi potest
 pieta-

pietati, & nomini) etiam melior. Ergo viuat, qui nobis diuinitus exitit. DELPHINVS, & tot annos viuat, quot nascituro vota concepimus, quot plausibus natum excepimus. Viuat, donec nullum Europa patiatur hæreticum, nullum Ecclesia non sibi subditum videat. Viuat secundus Regi, qui genuit, Reginae similis quæ peperit, Gallia maior, quæ flagitauit. Superi, qui dederunt, æternum seruent; Ciues, qui petierunt, Patrem sentiant; Exteri, qui timuerunt, victorem ferant, Fæderati, qui exoptarunt, triumphantem videant. Diu expectatus, nunquam recedat; miraculo genitus, miraculis fulgeat; cælo delapsus, terris imperet. LVDOVICVS meruit, LVDOVICVM æquet, ANNA obtinuit, ANNAM felicitet; Gallia suscepit, Galliam amplificet Augustæ Prolianni mille. Imperatori nouo coronæ mille DELPHINO Gallico victoriæ mille; vt pacem reducat, ut hostes

res conterat, vt oppressos liberet, ut
Ecclesiam protegat, vt mundo impe-
ret, DELPHINVS VIVAT. Hæc sunt tu-
orum vota Rex Christianissime, hæc
publicæ omniû, tibi, tuoq; sanguini fau-
sta precantium acclamations. Det ti-
bi DEVS ætatē, quam mereris, DELPHI-
NO, quam cupis. Illius ortu ita gaude-
mus, vt tuum nunquam audire veli-
mus interitum. Viuat ille diu tibi, tu
nobis semper, imperet in ævū, dum se-
rò capessit Imperium. Alios enim à te
LVDOVICI, Gallia Principes, alios à te
mundo ANNA, Dominos postulat: quan-
tumuis multos dederitis; pauci vide-
buntur, quia rarum omne, quod opti-
mum. Date filios, videatis Nepotes,
& talem senectutem, quam sibimet
optet Pronepos, cernat in Proavos;
tam fecundam Borboniæ gentis seri-
em Gallia numeret; quæ nullum finem
habeat, Orbem impleat Vniuersum,

horitate
pieres p
e nobilit
tiquis de
lle crede
qui Te
uideris,
m magr
spectacu
Appar
stabilis
Sorore
ARINAM
atrem a
probitat
amplè s
effecit
unda no
, & al
gium z
na profe
naginem
oneq; &

Quòd











